

香蘇山館詩集

香蘇山館詩集後序

詩以唐爲歸自元以前無異說也迨前明之季始有祧唐祖宋之說而詩教之分歧遂至元黃冰炭之不相入嘻異已夫詩至唐人而後體格大備其時英靈間氣揆藻摛華遠宗三百上掩六季爲千古言詩者之揔萃不能踰越也宋以後則尙策論尙經義不能專力於詩惟一二大家推陳出新挹唐人之精華而去其糟粕論者遂以爲與唐異趨俱矣蘭雪生秉異才早承家學乾隆甲辰春

高宗純皇帝車駕南巡君年未及冠卽以詩冊進呈

行殿自是遨遊吳越齊楚燕趙之區名山大川旣足以助發其奇又與海內賢豪長者定交故其名益盛而所造益深旣以鹿鳴舉於鄉人咸謂當登延閣侍邇英以備

聖天子之顧問顧沈淪不偶屢躋春官不得已乃以國子博士奏名尋又改官中書樸被入直四壁蕭然人無不以東方囊粟爲君惜而君處之晏如僦屋數椽閉門覓句孺人稚子圖史自樂若不知以名位爲榮者嗚呼亦可以觀其所守矣君詩雄深超逸不名一家自李杜王孟韓歐蘇黃以下皆在鎔鑄之中而清思麗句盡態

極妍復兼近代諸公之長學者以爲蔣藏園先生後一人而已余與君同舉庚申鄉貢又以陳石士詹事故爲姻家二十年來頗受切嗟之益余以資鈍故兢兢於前人之矩矱無敢失墜君則以縱橫變化出之顧喜余詩且於余之論詩稱爲知言其兼收并包而深入古人之堂奧可知矣夫詩家之派別若江河然河出崑崙墟而奔騰浩瀚雄於北條江濫觴於岷而澄泓演迤雄於南條其地勢雖不同而波流浸灌以成其生物之功潤下之性者無不同也君詩得唐宋之會通以無愧其鄉先生而津逮後學百世而下卓然推爲一大家也又何疑

平歸安葉紹本

乾隆嘉慶之間海內以詩鳴者咸稱黃仲則仲則奇情
超邁調逸氣空論者謂其才近太白似矣同時才力足
以並驅者爲吳蘭雪蘭雪才雄氣邁思沈學博能狀難
繪之景寫難顯之情他人極力爲之指僵穎禿蘭雪顧
從容揮灑其境屢變而不窮比而論之殆一時之二傑
乎仲則蚤死其詩後刻傳乃稍廣蘭雪自弱冠至京師
王述庵翁覃溪秦小峴法梧門諸公盛相推重自是遍
交海內名士酬唱四十餘年未有或先之者至於篇什
傳播海外者尤多朝鮮侍郎申緯推爲詩佛吏部判書

金魯敬父子以梅花一龕供其像及詩嘗於道光丙戌三月二十五日集其國之名宿置酒梅龕爲蘭雪遙祝六十初度好事傳爲畫圖琉球陪臣向邦正等以嘉慶十年奏請入監肄業出蘭雪門下及學成歸國奉使來朝者皆欲得其贈詩爲榮甚矣蘭雪才名之盛也然蘭雪夙留心於經世之務每以不得一試吏事爲恨乃自爲諸生應甲辰

召試不用久之僅舉於鄉數試禮部不第友人助之始以貴爲博士復改官中書浮沈國子學及內閣者且二十年今逾六十曾不得一行其志特於當世之以幹濟

聞者心重而推挹之惟恐其用不竟異哉蘭雪之志甚大而其遇乃窮也豈予之名者嗇其身天之所以待詩人者理固如是耶抑或者蘭雪精力方健將晚達之是固未可知矣余識蘭雪最後蘭雪甚愛予五言古詩自以爲不及則蘭雪之謙也而厄於仕途兩人適有同慨蘭雪自傷其志不遂僅以詩人聞也晚編其集爲古近體若干卷屬余爲序歲餘因循未就今且遠別乃述平素所傾倒者如此後之覽者因詩以求其志卽蘭雪可知矣桐城姚瑩

評跋

王昶蘭泉

西江自明以來稱詩者眾而無卓然傑出號大家者予嘗以語蘭雪蘭雪深以爲然今自蔣荅生後二十餘年蘭雪繼之予兩至南昌故才人多在門下如雲衣照南修之三吳咸以詩名當世而蘭雪實爲巨擘詩如天風海濤蒼蒼浪浪足以推倒一世豪傑每閱數年輒來三泖漁莊省視故錄其詩較多

袁枚子才

讀完見示詩先後五卷如一疋雲錦滿目妍華怡尋不

出一縷跳絲年未三十而天才學力一至于斯且用筆能放能收可華可朴記心餘先生見贈云古來只此筆數枝怪哉公以一手持請以移贈足下

王文治夢樓

才湧如潮情艷于月音節之妙可被管絃又曰余嘗以音樂論詩蔣心餘朱子穎如大鼓洪鐘沈雄暢遠袁子才如琵琶妙能移人蘭雪才似蔣而稍遜其橫情似袁而不盡其妍氣似朱而不極其縱以哀艷之思發清壯之響穿雲裂石往而復迴其鐵笛乎

洪亮吉稚存

詩必有珠光劍氣始信其不可磨滅蘭雪詩珠光七分劍氣三分仲則亦然吾詩劍氣七分珠光三分船山亦然

秦 瀛

近來稱詩家非入于僻澀卽流于纖靡作者能自出新意而聲色香味具足京師詩人雖多得不推蘭雪爲第一

楊芳燦蓉裳

身騎鸞鶴手把芙蓉飄飄乎遺世而獨立也山林畏佳雲濤滅沒浩浩乎御風而孤行也蒙莊豈異人意成連

將移我情時秋空澄明一碧萬里企脚北窗輒作天際
眞人想

曾燠

沈雄而以駘宕出之精鍊而以機神化之故是奇作
激宕悱惻可泣鬼神雖以蘭雪天才非中年不能有此
然至爲此詩而心良苦矣

鮑桂星

規太白者風骨不遒樵玉局者神丰太峻至長爪生而
僻澀之病多矣作者擅三家之長而祛千古之失要其
性靈山水吐納雲煙則陶謝爲宗風騷作主求之今代

疇與並肩

吳雲玉松

近代詩人多以馳騁擅場作者舉頭天外電光照人而筆力所至心手相副歛磅礴于謹嚴寓超騰于深穩吾于此集有觀止之嘆又曰御風騎氣得太白之髓忽而奧衍刻酷體具韓孟忽而疎脫傲兀神似蘇黃卿殆異人不可測也

馬履泰秋菽

天才仙才其工處在章法句法字法其妙在筆外有筆味外有味每著一語耐人百思卽古人中亦不多見況

吾輩耶

張瓊英鶴舫

近體有清壯者有秀遠者次亦明麗時出新意五七古
雄奇沈鬱倏忽變化不測掣風霆唾沆瀣李蘇以來此
其鼎峙未知繼此誰四傑也

題詞

謝啓昆蘊山

唐代仰昌黎及門得湜籍宋世推東坡秦晁樹勍敵吾
師翁北平天下稱詩伯校士古豫章遺珠洗沙磧晚覲
蘭雪生談詩膝前席三千桃李士曷嘗見此客下筆驅

風霆雨花潑硯墨我時居蘇潭握手數莫逆呼爲忘年

友論難透肝膈回憶卅年前蘇齋量玉尺鈍夫楊君同宗岱

登第詩窮老山澤魚山馮君敏昌萃粵秀鴻雁無消息惟子

與我親蓬萊翁師閣名奉杖舄江水通吳會岱雲合冀北我

衰牽吏事君獨振高格燕市碎瑤琴赤幟奪趙壁傾蓋

迎公卿繡絲盛裙屐白下朝壁箋黃樓夜吹笛細雨弔

南朝斜陽訪蕭宅壺觴廿四橋花月霓裳拍鄧慰晴雪

霏聖湖柳花白過訪手一編香蘇嵐翠滴人誇子才艷

我意殊不憚芙蓉本天然出水去雕飾誰知遠污泥一

生自淨植出世九仙骨降魔三寶力經術宜貫通風騷

有正則言出必自己紙上皆陳迹吾師持此論子也守
不惑生氣鬱蓬蓬遙情寄脉脉特挽西江流不受西崑
役抗手揖韓蘇逢源追甫白甘下梅花拜寒香沁詩魄
君有拜梅圖子如日初升竿頭進方亟讀書要致用芸苗戒
無益我有蘇潭集瑕瑜子能擇我今評子詩真賞乃心
獲窗燈話宵雨隄草動春碧快論驚鬼神高歌拓金戟
慎哉江上波寶此連城璧

譚光祥退齋

我年十八君十九論詩白下初結交壯遊四海二十載
一生低頭惟孟郊十年八年偶一見每見一回詩一變

哀絲豪竹亦收聲何況濃香與繁艷歛肉入骨皮入筋
筋骨不露氣愈醑鍊神馭氣出殊相雲海湧現天人身
山川風月本無語一任詩人恣含咀那知靈氣偏獨鍾
只有君能傳法乳奇想想入非非天微妙屈曲歸自然
萬花香味釀成蜜一潭一月千潭千藏園不作湘雪死
絕代才人世餘幾曲高和寡識者誰蔣三五十師吾子
我頭未白成老翁嬾病自安百不工因君高詠動清興
涼蟬亦復嘶林風句塗字乙意難顯紙上荆榛費除剪
便焚筆硯心亦休苦愛君詩力終勉蓮花博士天下無
仙骨要與凡人殊此才窮餓亦千載特立況有天公扶

將相功名誰不朽
新詩萬篇傳萬口
攫取須防雷電來
我正高歌拍銅斗

周有聲雲樵

心如春空雲筆如都盧
撞輕風變滅幻烟景妙舞騰擲
排旌幢晴天裊游絲冉冉紆復直
大冶躍千將晶晶視
難逼奇來欲挾造化根
爽處直教巨靈劈人間千態萬
狀物象不可殫不意乃在先生之筆端
十年再見遂如此更數十載誰追攀
書生志願奢作事少儕伍區區文
字間亦欲論千古自言別後走天涯
觸眼到處紛天葩
江山蠲滌淨魂魄烟月溶漾滋靈芽
胸中奇氣鬱律掩

抑不得下一吐作青蓮花豪騰墨洒風雨快百丈神
淵走靈怪一瓣心香祇自知當時更下何人拜雅才賦
手誰雌雄鳥空鼠卽羞寒蟲摩天巨刃孰敢敵惜哉世
無鉛山翁君才磊磊翁可作君名如翁滿京洛可憐我
尙及翁門璩璋已似羊公鶴

吳錫麒穀人

流水逢今日東風宛昔年能兼情味遠端以性靈先斟
酌萬花妥盪摩孤月圓飄飄乘逸氣將我亦如仙

趙翼雲崧

峭帆風緊過江來草草杯盤半日陪我讓出頭非調語

世無敵手始奇才綠楊枝記西湖折

昔與君別于西湖

紅杏花

遲上苑開

下第南歸

卻憶同游半殂謝那禁別淚滴蒼苔

西湖

之游謝蘊山
中丞馮星石鴻臚同讌集今二公皆下世

劉嗣綰笑初

倒盡行囊鑄賈金新詩一卷動清吟蒼涼燕筑雲中調
幽咽湘絃水上音塵海共傾知己淚名山應識替人心
開編那不成惆悵落葉蕭蕭擁夜衾

揚州小住更蘇州難得湖山有雋游當代論交餘老輩
少年傾蓋遍諸侯風塵失路君多感花月逢場我亦愁
不是天生果仙骨買絲肯到瘦吟樓

陶本忠香泉

新詩千首敵封侯如此才名亦倦游
並世公卿推絕唱前身仙佛定雙修
幽燕地壯宜懷古吳越江空易感秋
夢到故園風日麗萬花圍住讀書樓

江鄉幾日放歸船容得閒身地亦偏
閉戶早成千載業刪詩斷自廿年前
貧來菽水餘真樂畫裏溪山了夙緣
風雪滿身花下拜不妨人喚是梅顛

一字曾經百鍊成但看筆陣已縱橫
收將倒海迴山力迸入穿雲裂石聲
誰道芙蓉擎水出天教騏驎踏空行
騷壇旗鼓知何限甘讓先生作主盟

來依講帳碧紗籠便有香生兩袖風
如是我聞拈謁妙每逢人處賞心同
師門敢負恩知重句法難分造化工
願附紫薇圖派後瓣香低首拜涪翁

王儀鴻風山

詩人孰謂罕見售李白杜甫曾待漏
才人孰謂鮮眉壽

山谷東坡年豈茂近代正宗數衰

簡齋先生蔣定甫先生

狂瀾力

砥同聲臭君復繼起爲大家騷壇旗鼓推領袖其窮其

厄古無比屈不終屈獲天佑十九偕兄

茗香先生

賦行殿雙

鳳垂翅驥困廐天翻地覆乾陰失廉吏兒孫孰拯救覃
溪先生特憐才拔取機雲目不瞢荆花仟擬連枝芳無

端忽折一枝秀孤鶴哀鳴失儔侶其聲悽愴動宇宙覃
溪憐君踰骨肉獨以詩髓相受授君傳其傳氣愈雄高
凌雲漢深泉竇能放能收兼華樸袁評超從真出翕都參
透一時豪傑盡壓倒題襟邦上無出右一時閨閣盡傾
動瘦吟樓願買絲繡我得爲隣隣亦芳惜哉追隨願未
償庚寅偶歸擬話舊出牧黔西命匆忙臨行貽我香蘇
集如讀仙書入仙鄉泰岱邱壑胸來往羅浮風雨夢徇
徕廬山搜遍武夷出瀑布千丈雲千囊塵心淘盡慧心
生凡骨立換冰雪腸梅隱中書蓮博士頭銜也與花爭
綺晚年兼理琉球學不減鶯湖傳經史朝鮮判書奇復

奇供像梅龕及詩詞侍郎申緯更殊絕奉詩爲佛佛卽
詩我誦君詩如餐梅齒牙清芬愜溯洄我誦君詩如面
佛邪魔妖魅盡翦拂安得拈花微笑發君爲世尊我迦
葉

陳世慶聰彝

仙心一種帶烟霞字字珠光豈漫誇有古人風方絕調
無才子氣始名家奇書鎔鑄空千卷老筆縱橫舞萬花
除是藏園誰合傳世間繁響競箏琶

杜陵家法傳吾祖天馬行空鶴唳秋海內已看無敵手
平生還肯爲低頭一庭花月聞清詠六代江山約俊遊

述德詩成增感涕
津梁惟向謝公求

王以昌小湖

早年負米走天涯
一檄傷心鬢已絲
怪底蓮洋能得髓

性情以外總無詩

語本翁覃溪先生詩髓說

朝鮮名士說金

魯敬申

維生日重教翰墨
陳詩佛一龕梅

萬朵瓣香爭拜謫仙人

管夫人亦擅才華
妙手丹青數大家
莫爲中書閒寫照

先生詩影卽梅花

絳帷纔近已衰年
咫尺偏疎見面緣
何日花前容載酒

論詩重上石溪船

吳 玠瘦生

夢樓太守善論詩嘗以八音論詩律洪鐘大鼓蔣與朱
袁老琵琶亦難及先生天資獨自然詩如鐵笛調高絕
穿雲裂石往復迴蛟龍起舞波濤立先生少孤家復貧
家難官逋百憂集萬里飄零負米身夜半高歌鬼神泣
長安倒屣遍公卿一第蹉跎年四十槐廳微省摠冰銜
勉爲衰親山再出從古詩人例數窮經世才高展無術
若教應運作名臣豈獨流傳在篇什詩雖餘事亦驚人
三分劍氣珠光七洪稚存太史謂先生詩有劍氣三分珠光七分想當落筆孤
行時其中護持有神物海內詩人豈不多大都浮華與

勦襲可憐敗紙如山高轉眼風波盡漂沒先生詩獨尙
清真高格入雲思入骨其氣黃河捲地來其筆太華倚
天兀三峽驚濤觸石迴妙以雄宕爲音節羅浮異境豈
人間妙以風雨爲離合天才仙才並鬼才先生腕下收
都畢我詩初學苦未工牙慧尋常亦羞拾安得絕唱如
先生沈鬱頓挫造其極才空四海氣千秋藏園以外一
枝筆

閨秀

金逸纖纖

亂散天花作雨飛果然一字一珠璣風騷力主年猶少

仙佛才兼古亦稀
六代青山搖醉筆
一春紅雪濺征衣
如何倒遍羣公屣
聽到啼鶻尙未歸

替傳新句遍公卿
閑閣從今得重名
見說百篇邀手錄
但更一字總心傾
禁寒選夢燈花瘦
扶病酬詩淚墨并
許我千秋傳一序
買絲何日繡先生

香蘇山館古體詩鈔卷一

東鄉 吳嵩梁 蘭雪

南昌使院送督學翁覃谿師入都

古人重氣誼大道資扶持言所不得已匪矜文采奇今
人富贈答貌合而神離苟非金石交易取瓊琚詞我恨
識公晚夙昔夢見之坐我春風中十年酬渴飢采蘭出
幽深相馬略瘦肥遂令蘆中人肩與羣彥隨是時公校
士我方以病辭下車問姓名儕輩或未知一鷹國士遇
萬口傳新詩射雕慚未能病鶴聊自嗤公初見予病鶴賦及和韻諸詩
以射雕手許之孟秋來豫章函丈欣所依拜像谷緣屋山谷三集注本

刻成同人拜文節公像於谷緣書屋盟心以不欺同學二三子析義窮毫

釐永懷千載業惜此寸晷移毋以利欲奪毋以門戶岐
肆力苟不倦深造各有時勉旃佩明訓終身無暫違
學詩雖一端其妙兼眾體材力任發揮性情乃根柢作
者累百家波屬而雲委中有真氣存萬變同一軌近代
王漁洋以禪喻詩理五城十二樓妙悟在彈指自謂得
天章瀉山有寂子萬古玉女峯九曲崑崙水詩格信超
然蓮花出泥滓嗟我本鈍根仙才敢竊比落拓少年時
遭遇固相似天章年廿三知名自京邸廿五謁漁洋遂
倒羣公屣我從蘇齋遊早僅一年耳相依在平生傾心

對知己袞袞翰墨場緣情多綺靡高才誠不乏幾人得
真髓願探風雅源端自孝弟始情深則文明庶追古人

旨公以蓮洋見髓見獎因作詩
髓說云性情者孝弟而已矣

吾母年五十霜雪先滿頭皆以不肖故貽此無窮憂賤
子年十五挾策來皇州一獻

行殿賦四驚蕊榜秋蹉跎有餘痛歲月無暫留熒熒兩
孤兒菽水將安求力不能負耒智不足持籌蕭颯任華
帔寂寞王粲樓丈夫貴自立貧賤非所羞違養而廢學
此罪逾山邱猥以臃腫材乃蒙大匠收讀書勉用世持
躬勗自修至愛等骨肉折節如朋儔吾黨貴知己感恩

詎足侔一身兩兼之公遇爲獨優念我疾病多醫藥靡
弗周知我貧養難代爲甘旨謀史筆著廉吏厥義歸闡
幽八分十四字何啻萬金投持歸壽吾母感激當涕流
況爲人子者誓心安足酬

受知日以深酬恩復何有聞別倍黯然依依公左右雙

鶴秋堂陰一步一回首自憐雙翅垂似感主人厚使院舊蓄

雙鶴瀕行贈謝蘊山太守

東軒我舊居離羣悵未久簌簌叢桂花零

落傍牕牖袖中秋渚詩

九日餞公於北蘭寺有秋渚詩畫卷

三復不去手

江山開畫圖風雨記重九高會繼龍沙此歡矢不朽公

還到長安勝遊許續否行勘

陪京書歸祝

聖人壽我懷香蘇山讀書奉慈母草戀三春暉米謀百里負聚散無定蹤出處期不苟撲帽江風寒餞公折哀柳淚下不能揮點點滴樽酒

喜晤楊邁公

護

比部賦贈

蒙生十五齡厥惟庚子歲射策黃金臺頗挾元龍氣君年逾三十公車入都市跌宕公卿間一檄困毛義識我儔侶中忘年結深契重我若璠璵愛我若昆弟一語傾肺肝片紙登篋笥湘水喻深情楚雲積高誼是時同郡中簪屐集前輩小子廁坐隅狂嘯巾幘墜爛熳開天懷

往往軼倫類恕我不折弁謂我率真意風雪滿長安晨
夕策單騎不歌亦骯髒不飲亦沈醉鵬鶚將橫空鍛羽
乃哀唳羣公放春闈我亦落秋試步履東華來慰藉極
再四送我遊大梁慨然撫鞭轡一別桃五花烟樹擾離
思兩寄停雲章三接懷人字甲辰下金陵

天子翠華蒞獻賦冀受知報罷復投袂同學四五人零
落等秋蒂鸞鶴翔天衢故人職清貴直廬薰朝衫詞壇
樹大幟關河千萬重知己勞寤寐恃此素心同豈以升
沈異篇舟返東汝稍諳故鄉味痛哭蒼天高吾父竟遐
棄煢煢奉孀母相依惟伯季負笈古豫章蕭條共姜被

破屋燈火深禿管兔毫退十月霜氣深閉門葉滿地白
髮愁倚闥游子驚嚙臂我將負米歸君乃裼裘至相逢
顓江頭促坐古書肆眉宇辨神明容光念顓顓再見痛
握手多難擬裂眦眞愛才者誰溝壑恐先躋讀我別後
詩掩卷發深喟莊容爲我言作詩戒奇麗絕艷而驚才
人憎鬼亦忌長吉摧少年飛卿困一第才士古多窮文
采階之厲晨葩無久鮮峽水無留勢意厚音和平斯爲
公輔器咄哉蘆中人休明慚鼓吹杯酒澆不平五嶽鬱
胸次秦筑發壯懷蜀絃感流涕調苦知音難鐵骨空自
媚緬彼當代英載筆寵金匱文章妙有神聲名豈倖致

報國無一長儒冠能不媿再拜受忠告願附雲中驥磊落七尺軀蒼茫十年事北風吹雁羣日暮心如刺

書東坡感舊詩後兼呈伯兄

有序

嘉祐元年東坡與子由同舉制策時年二十六子由二十三又三十年作此以敘其離合之悰乾隆戊申季夏予與伯子茗香僦居永福菴卽二蘇寓懷遠驛之歲感賦此詩

東坡兄弟妙天下讀書致身俱少年中間萍梗三十載送別感舊詩纏綿我生廿三君廿六坐惜年華如轉轂文章科第兩蹉跎上愧子瞻下同叔憶昔隨宦古大梁

朝共筆硯宵聯床長安射策但兒戲鴻羽一鍛分翔翔
法駕南巡翠華轉柳色鶯聲滿江甸賦罷凌雲壯志摧
吟邊春草離愁徧自此佳時心賞違看花把酒淚霑衣
秋風一棹歸茅屋雲海回頭萬事非翁今黃泉母頭白
買山負米均無得幾年飄泊灌嬰城禪榻茶煙對蕭瑟
笛簫微涼病骨蘇挑燈把卷增躊躇不識當年懷遠驛
風光可似此間無

贈何南谿

飛熊

廣文

讀書貴有用制行先不阿卓然古君子砥柱當江河
內艷才藻珮玉鏘鸞坡持世苟乏具露珠綴絲窠南谿

負高義出處無偏頗著述五十載修名立坎珂頭白氣
不屈家貧書更多一官棄窮僻傲骨山差我渺焉黃鵠
舉弋者猶張羅

識公春明門八換裘與葛覲面失師資秋夢水雲闊童
年徇美名本根已先撥憂患生道心風塵悔跼踖自立
良獨難恐爲浮念奪譬諸斷酒人聞香更流沫旅居灌
城隅禪房曉翠潑杖履許再親蕭蕭映華髮致身以文
章要當辨本末德音幸可聞願言慰飢渴

題白庵照畫蘭

吾家季子眞無匹論詩論書皆第一餘思散入蘭蕙叢

興酣搖筆風雨疾探勝曾爲南楚游紅蘅碧杜寫清秋
月滿九疑吹鐵笛天清瀟水放扁舟年來愛作江南客
烏帽狂歌拓金戟秦淮煙柳虎邱花零紈剩楮紛狼籍
去歲識我磨鷹城拍肩大笑懽平生酒酣作畫追三昧
燈暗談詩到五更早秋一別今重晤新畫新詩不知數
手持橫幅乞我題萬葉千花灑風露我知季子非畫蘭
胸中真氣久鬱蟠眼空四海一知己風味乃結湘毫端
白庵嘗自題畫蘭贈余云平生一蘭雪風味結毫端花枝空處著疎篠翠影幾竿
並娟好衡山黍谷歸塵埃得此豈非希世寶夜闌燒燭
坐荒齋吟魂花影俱徘徊西風落葉打窗戶幽香萬斛

飛空來

舟中次韻呈徐袖東

觀海

通守

津亭黃葉飛遠笛作三弄風帆指臨江煙水渺章貢蓬
窗可容膝因之息征轡小飲擘霜螯酒傾吏部甕繫纜
月初上漁者已收纜侍坐寬禮數雄談敢伯仲先生謫
僊人青天騎赤鳳餘技涉騷雅詞鋒七札洞醉覆宮錦
袍筆花照幽夢彈琴聊自怡投壺必命中絕塵去堂堂
天馬安可控步趨今恨遲孤陋昔所恫妙句傳烏絲曾
經百回諷嘉會欣在茲金樽浩歌送

疊韻再呈袖東通守兼寄李松甫

秉禮

比部朱小

岑依眞布衣桂林

禿管不盈尺萬象困嘲弄刻楮毋乃勞食芹詎足貢浪
游悔疇昔辛苦事鞭鞅常負故園花不抱漢陰甕皓羽
傷在樊錦鱗喜脫纓織屨而辟纁遐哉於陵仲羅浮明
月滿梅花舞么鳳仙侶不可期白雲滿岩洞近興松甫小岑有偕
隱羅浮之約撫躬愧蹉跎知己感魂夢手無金僕姑焉得矜
屢中碧海捲雲濤長鯨幾人控新知良可懷舊游亦堪
恫耿耿平生心慨然託吟諷片帆下章江願借晨風送

黃大癡山水

大癡老人殊不癡誰云黠似偷桃兒鳥目山頭隔江月

曾照酒觥翻落時老人學道不工藝偶借林巒寫胸次
晚年畫法逼荆關殘縑剩楮俱生氣此幅圖作山居圖
妙於渾厚含清疎烟嵐面面翠欲滴霜葉蕭蕭紅滿株
何人卜築萬山裏茅屋數間俯秋水得非老人自寫真
想見林間好巾履絹本摩挲嘆觀止更五百年誰有此
香光居士曾手臨白云猶不得其似何況紛紛諸畫史

奚鐵生

圖

畫梅橫卷

覃谿先生屬爲
邱鐵香太守題

蓬鶴軒中坐秋雨鶴唳三聲漏三鼓忽撥昏燈看長卷
萌坼朦朧句爭吐何人筆底春風迴渡江越嶺驚早梅
老樹僵若瘦蛟卧千枝萬枝顛倒開尋常籬落那有此

云是羅浮山中親見來師雄夢醒翠羽喚紛紛落月盈
蒼苔此是嬋娟林下影四百三十二峯安在哉我家石
溪上有梅八九株溪上一冬好風日無日不對花讀書
曾乞兩峯寫吾意江南春信今茫然未見羅畫見奚畫
不可謂非翰墨之因緣詩成大笑呼臞仙持寄老鐵喜
欲顛何時爲我補作石溪探梅卷與君雪後同放西泠
船

東山書院示同學諸子

讀書不聞道病若瞽與聾欲收麗澤益端賴他山攻郡
縣立小學此義推辟雍豈惟治經義治體曰以崇東山

湖淵源講學由晦翁趙相

忠定公

任名教身率弟子從俎

豆七百年絃歌儼中峯餘敬及草木手題仰雲風我來
焚瓣香寤寐精神通鷺湖暨鹿洞地異道則同涵養貴
心得踐履歸實功毋以干祿念錮此靈明胸

才士富文藻如女子有色苟乏幽貞資何取艷傾國靡
靡草本花由來少佳實兒女炫青紅究非鼎鼐質內而
和順充大者本根立萬物歸陶鎔六經備繩墨乃知真
文章一字無外得鐘呂卽心聲乾坤卽心畫著述誇體
裁吟諷取標格中無真我存雖工匪極則繁余傳所聞
安敢矜創獲獨愧本業荒空言竟何益淬厲方自今詞

章戒偏溺勉從躬行餘乘時各努力

雲風堂

朱子嘗注
離騷於此

雲風記手題紫陽讀書處蕭蕭庭樹陰夕陽見鴉步何
人載酒來一問離騷注

市湖

環城九千頃湛然磨鏡銅月上或倒影雲過無留蹤祇
餘青天色萬古涵虛空

琵琶洲

落霞散空波向來歌舞地蒼茫烟樹中時有片帆至忘
機讓白鷗夜夜占沙睡

乘風亭

遺構不可尋清風喜無恙披襟正復佳高嘯萬峯上片
雲從西來吹墮紅藤杖

花蕊峯

此峯頗幽秀問名愛花蕊我來招晚涼湖山曠如此萬
朵青芙蓉娟娟隔秋水

白雲亭

歸抱山中石去爲天下雨白雲亦何心偶然成出處一
笑坐孤亭幽人復誰侶

思禪寺

一百八聲鐘聲聲到湖水湖上暮蟾生山中栖鶻起趺
息聞定香萬緣埽糠粃

龍池

昨夜怒龍出雷電到窗戶侵曉看靈池荇藻綠如故神
功思議難此亦參禪處

茶竈

一榻傍禪屋鬢絲颺花風坐石啜佳茗想見桑苧翁越
水如可嘗臭味平生同

越水在市湖中陸
鴻漸嘗汲以煮茗

湖上

經旬不著冠道書聊一把倚欄看湖水蒼然遂成夜平

楚烟靄交空波鏡天寫隔岸燒松明知有父魚者
閒亭棲白雲寂寞一樽賞日餐市湖秀蓬山結遐想月
出羣峯低露下百蟲響乘興望匡廬指筇又孤往

晚涼

綠陰招晚涼幽棲塵事屏明月上高梧玲瓏散清影垂
垂露華滴稍稍風葉定坐念素心人徘徊惜芳影

次韻覃谿先生題香蘇草堂圖奉寄

解攜卽萬里精神常合并千載託久要豈啻終身盟相
求在感氣相應惟同聲纏綿結蘭佩慷慨歌兕觥趨風
愧自隗立雪懷依程技容奏竽濫韻流鼓瑟鏗威鳳一

高翔別鶴多悲鳴病起欲頭白依人誰眼青感公執高義酬公以積誠所期厚根本不朽非虛名

原唱附

翁方綱

覃案

諸子期春聚子獨何時并香蘇與蘇齋耿耿此心盟
此山秋雨時此屋夜泉聲一几辦香篆一燈慈母觥
夢寐與我俱雲龍矢脩程百家入騰蹕大海一鯨鏗
眞氣必我應儻先數子鳴是日蘇齋榻雲結匡廬青
會合定有期旦旦蓄精誠空山慎獨處努力勤令名

次韻覃谿師題蘭雪圖

人間清絕那有此謫仙語妙偶得之

清風灑蘭雪太白句

滿叢冰

雪花開時蛺蝶黃蜂知未知東風早晚透消息辛苦耐
寒須努力素心一點傾向誰日暮空山雲潑墨

原唱附

翁方綱覃谿

孔子言蘭不言雪此義韓子乃補之嗟哉志士感後

時仲舒休奔兩不知

昌黎蘭雪並言本于傅休
奔休奔之言本董仲舒

空山

孤根日滋息大哉陽和天地力悟徹蒼茫獨立人水
石昏陰淡如墨

市湖新漲

雷雨夜傾羊角峯卧聽芭蕉如打篷曉起推窗看湖色
蒼茫巨浸搖秋空柳腰沒水洲尾斷刺船沽酒來村翁

昨日騎牛吹笛處高梳大舶乘長風蓬萊清淺理互易
轍鮒何必哀途窮憑欄且玩烟水妙漁蓑釣笠吹濛濛
滄波浩蕩白鷗喜忘機儻與幽人同雨腳漸收玉宇淨
落霞散綺天爲紅琉璃萬頃湖面闊峯峯倒映金芙蓉
湖山如此好粉本著身日在橫圖中摩詰已往妙手絕
詩情畫筆難爲工不如坐對一壺酒嵐翠潑衣雲盪胸
明月娟娟到湖上下界杳杳聞清鐘

兕觥歌爲常熟趙文毅公五世孫者庭刺史賦

在觥

曲阜顏衡齋家尊翁先生索歸耆庭作歌紀事

天鼓鳴天晝昏丞相不去纍臣去杖血淋漓辭國門心

肝鑄成鐵生死酬君恩腊肉大如掌持用貽子孫堂堂
庶子眞公友親製兕觥酌離酒黃流在中理沈默飲此
千秋爲公壽公去跨鯨背蒼茫二百年兕觥數轉徙所
在光燭天雲初五葉傳忠孝璧返連城告家廟焚香拜
誦蘇齋詩天上信眉應一笑君不見並時大節推吳公
玉斚沈埋劫火中一角文羊尊九鼎江陵故鬼哭秋風
錄別詩寄伯子茗香都中

嗟予伯行役忽忽記春首明月方傳柑碧烟未垂柳
水春波寒離愁釀春酒風吹歡笑聲淚落分攜手分手
何足悲此行非不偶內顧懷深憂時事值紛糾上堂拜

阿爺瓣香祈默佑下堦拜阿孃看花祝眉壽詩書勗弟
昆璽鹽勉閨婦哽咽各在胸慰藉乃盈口徘徊里閨出
厯碌單車走白髮尙門閭烏帽已林藪阿弟更追送離
懷願重剖頃欲爲君言當前碍慈母君今行萬里歲月
指頻僂持此旬日糧去住策何有行行過楚豫先公從
宦久姻婭及門生各各綰銀綬儻念葛帔寒予以麥舟
厚苟得非所欽義來諒可受悠悠關路長孤征悵無耦
善保千金軀如在親左右與君本一身不克聚蓬牖地
隔心豈殊君行我居守茅屋磬孤懸瘦田石盈畝忍令
白髮人晨夕缺甘澁跬步如履冰轉喉輒招咎脫身荆

棘中遠巡覓升斗千鈞繫一髮萬事掣雙肘念此肝腸
摧鮮血痛欲嘔出處同艱難險夷慎馳蹂收淚拜車前
加餐期別後哀哀失羣雁纍纍喪家狗飄飄不繫船粲
粲受辛白誰云錦繡腸羹藜而飯糗病骨搜憂患舊學
付榛莠男兒急貧養何暇謀不朽囊有百軸詩僅足供
覆瓿斫地拔雄劍仰天拊哀缶可憐氣所吞雲夢尙八
九窮途肯自墮扶持仗師友有得君早歸無米我能負
辛亥孟冬十三日將從戴蓮士先生入都留別家

人三首

朔風吹轉蓬歲暮將遠行壯遊雖可偕去住難爲情酌

酒登堂拜慈母衣線在身樽在手弱妹出閨兄異鄉宛
轉相依只新婦願母莫思兒兒歸三載期願兒能養母
母聞當解頤青霜紅葉臨川路車馬蕭蕭從此去可憐
返哺有慈鴉日夕歡聲繞庭樹

母曰嗟予季行役遠山叢叢江湜湜風雪關河一敝裘
制淚窮途莫輕滴平心涉波瀾跬步慎荆棘修詞戒浮
華嚮道持定力汝父九原余髮白杳杳南天望歸翼全
家甘口待汝身此身萬金汝應惜我聞此語重辛酸一
字一拜鐫心肝富貴本爲養親急貧賤乃知行路難
阿妹寫折枝持作贈行卷願兄簪杏花瓊林醉春宴新

婦貺玉環宛轉心自知願郎慎出處寶此無瑕姿烏帽
十年鬢絲改渺渺前期但雲海色笑無由慰老人骨肉
翻慚致深愛賣文不補衡門飢負郭無田初願違一第
還家米千斛春風應暖舊斑衣

夜過孤山看未開梅花

放鶴亭前鶴飛去繞亭種梅一千樹每到花時爛熳開
繁英墮雪香成路柘溪居士梅花顛吟詩刻意追逋僊
水邊佳句百回讀看花徑買西泠船西泠花事年年早
寶馬鈿車思芳草此花開向冱寒天玉骨冰膚爲誰好
空亭老樹斷雲遮尋徧孤山處士家冷蕊微含香蘊藉

疎枝先卧影橫斜平生愛花如愛色不賞濃粧賞高格
禁寒獨看未開花此意未教花痛惜湖月娟娟湖水明
短篷吹笛已三更夢裏綈衣真絕代相思一夜暗潮生

清江官舍卽席次韻謝蘊山

啟昆

觀察題種梅圖

卷

野人風味如野梅開卷便忘花與我探梅更讀種梅詩
一字一花珠一顆卷裏寒花花下身賞花原是栽花人
梅魂詩魄兩不辨生綃剪取江南春玉照紅羅自千載
雪天處處香成海一樹梅花一放翁誰家團扇今猶在
舊傳水部住揚州官閣詩成高韻流綠鳳枝頭二分月

花落花開經幾秋，竹榿金堤告成績。
紗帽隱囊命橫笛，手植名花締墨緣。
雙鬟唱徧旗亭客，離邊疎影認初真。
益信看花句有神，長松相伴鬚眉古。
雛鶴剩憐毛羽新，雪意欲成花未半。
秉燭巡簷更同看，玉骨天寒瘦不支。
金樽醉倒狂仍換，南國甘棠傳自今年。
年詩夢繞蒼岑，瓊枝千尺化龍去。
莫負小軒初種心。

同羅兩峯山人聘周駕堂編修

厚轅

宋雲墅儀部

鳴琦

樂蓮裳明經鈞茗香伯子集豐臺觀荷

柳絲踈地蟬聲長，鏡波灩灩開方塘。
百年相對幾青眼，一樽坐擁千紅粧。
臨流得句日已暮，插花起舞吾能狂。

卧遊今夜鑑湖闌明月滿船秋水香

立秋後一日法梧門

式善

學士招集積水潭分韻

得一字

文洗馬甯王給諫友亮洪編修亮吉曹侍御錫齡陸儀部元鉉周編修厚轅何

水部道生宋儀部鳴琦徐太史準劉舍人錫五

盧廣文錫琛姚孝廉思勤胡明經翔雲羅山人聘繪圖王孝廉芭孫記之

秋聲昨夜來吾懷已蕭瑟嘉招及令辰復此尋詩出潭
中荷萬花開謝頗不一敗葉或擎風初葩方映日睠彼
雲霞姿愧我鷺鷥匹素心幸與偕俊遊安可失鮭菜尋
荒亭茶陵訪遺帙小築隣西涯著書吾願畢

新田十憶圖詩

并序

邨舍多千葉桃花風日清妍慈母宴坐舞袖娛春
飛英泛酒以祝長安索米其樂何如作花院奉

觴圖

暖煙著樹花叢叢團圞笑語圍春風繁英一拂向盃墮
雲影酒波都浸紅天涯芳草忽成暮堂北花開春幾度
寄語家人好護持此是先公手栽樹

余署所居曰詩夢艸堂舊有香雨暖風籬院閉一
春詩夢在梨花之句作草堂尋句圖

新苔潑乳屐聲絕午篆縈紗烟穗結夢裏裁詩醒後尋
好花樹樹吹成雪何處青旗搖晚晴洗妝微雨最關情

惆悵南園胡蝶散一樽能醉幾清明

方塘一畝湛綠搖空山雨添流岸花倒影暇日意
行水畔和風所被襟袖皆春作柘塘春步圖

春水貼天花卧水一片絳霞吹不起水邊小立花邊行
滿挹花香袖風裏花放水流春復春鬢絲憔悴苦吟身
誰知薊北題襟客卻羨塘東岸幘人

蕙風閣女士同余晚坐詩云欲寫烏絲句未成薄
羅衫袖嫩涼生紫微花外芭蕉綠坐愛茶烟颺
晚晴作蕉陰茗話圖

甘蕉半捲花亞枝晴烟裊裊茶香吹綠雪一甌清徹底

嬋娟照見雙蛾眉紅袖籠詩曾記省笑君風味如佳茗
冰綃半幅畫鷗波爭及彈琴看鬢影

梧桐繞屋碧蔭四圍余兄弟讀書其中洗樹題詩
墨痕殆徧作桐屋讀書圖

老屋三間圍百梧低柯壓簷涼葉疎鐙影簾影落溪水
一榻對眠聞讀書墨芬濃沁苔斑古誰剝霜皮句重補
雛鳳雙飛正忍飢破巢夜夜愁風雨

香蘇山側小築數椽窗戶半開秋容可挹老葉酣
霜疎枝透日紅黃四照爛若春花作蘇山秋望

圖

屋後秋山淨如拭屋前紅樹醉秋色坐傍疎林把道書
夕陽畫出吟秋客十載歸心負薜蘿草堂問訊今如何
濃霜一夜咽蟲語脫葉滿庭空翠多

溪水抱邨而流芙蓉卧花楊柳浸碧橋畔徜徉日
與閒鷗爲友作石溪鷗伴圖

柳枝凋落烟影寒拒霜花重霜態酣石溪西畔好林壑
過橋獨步成幽探秋葉補衣閒未著單櫂江湖聽飄泊
西風合把釣魚竿三十六鷗尋舊約

矮松夾岸芳草沿坡笛聲來斜陽細雨中牛背橫
吹溪山皆應作牛坳吹笛圖

蒼龍吟罷聲裂竹反照林閒映歸牧松風一徑落梅花
吹遍山中招隱曲人海驚濤去拍天此聲只在溪雲邊
轉舵收帆無處好始知牛背穩於船

隴水清淺疎影倒涵烟冷雪晴香韻轉逸自花開
至謝日坐樹根苦寒不避見者呼爲梅顛作烟

隴探梅圖

溪冰照影雲滿身么鳳踏花啼向人禁寒倚樹不肯去
綈衣一笑天爲春隴首枝枝晴雪裏去年正買江南舸
故園芳信欲傳誰今歲梅花應憶我

礪泉下注稻畦玉聲泠泠隔溪猶響倦游憶此如

聽洞庭仙樂身世俱忘作稻田聽水圖

山中一雨田成壑山花盡擁山泉落欹帽芳塍愛獨行
白鷺影邊流漠漠夢到秋畦秋水清買田何日定歸耕
飽聽寒碧風前瀉自枕鴉鋤月明

書懷

青蘭無冶容託根況幽深和風一以拂揚芬出中林灼
灼桃李顏鬱鬱蓬艾陰亭亭空谷花耿耿持素心芳菲
不自達感氣誰相尋採佩願及時毋令霜露侵

野鶴負標格風塵苦憔悴豈無霄漢心亦爲稻粱累靈
鳳鳴朝陽聲聞託深契方同蓬島遊浮雲欲中翳孤心

本難羣鍛羽慚再厲翹首霜天高悠悠聽長嘆

紅拂圖爲胡黃海

朝雲作

一客髯如戟氣可敵萬夫一士岸烏巾鶴立身清癯一
人被服閒且都瓊枝照耀紅珊瑚明鏡爲心花作骨英
雄乃是傾城姝三君眼底天下無相逢一笑皆窮途乘
時各有萬里志良鳥擇林魚縱湖是時天色何慘澹冷
煙著樹霜葉枯盈腔熱血沸如酒寒氣不敢侵肌膚潭
潭公府銀沙鋪炙羊奉酒方歡娛黃金爲屋千斛珠玉
人竟與青衫逋富貴如此真庸奴人生合爲知己用遭
遇豈以巾幘殊俠骨無歸劍光死尸居相守紅顏污願

揖兩公拜一妹短裘單騎從路隅仰天大笑風雲趨鳴
呼安得丹青妙手爲補圖

爲朱素人題畫

一女收釣絲月鉤澹埽雙蛾眉一女持簪笠背倚斜風
鬢雲溼數卷書六尺牀醒便開函倦欹枕吟魂浸徹溪
波涼此君清福乃如此筆下胸中可知矣生絹要畫好
江南兩岸菰蒲漾秋水儂亦柘溪垂釣客平生讀書兼
好色蘇蘭淪茗憶樵青欲買扁舟歸未得年年鷗夢五
湖多細雨零花上綠蓑卷裏雙鬟能下拜新詩端合付
漁歌

喜晤方伯陳東浦奉茲丈

十年慕典型寤寐見顏色誼以桑梓崇分迺霄漢隔吾

父官中州恨未與公識耳熟趨庭餘歛襟誦清德太史

歸藏園謂蔣心餘先生袖詩求指畫出示贈公篇七字沁肝膈

去年過姑蘇甘棠歌惠澤愧附李郭舟霽光違咫尺司

寇今韓歐王蘭泉先生高義世無敵與公交卅年耿耿中誠

積謂公大雅宗樹立並雄特老筆追少陵美政方召伯

前日持節來旌旆駐京國子有願見心導以參末席是

日天暮寒青燈照街衢敝裘乘單車謁公行館側歡迓

荷降階傾談許接膝闊達寬禮儀纏綿感今昔愛才肯

兼收虛已如不克片時坐春風矜躁皆屏息模楷仰前
輩風采照巾舄豈惟問學資早受性情益嘉會欣在茲
見遲轉云惜經世與壽世厚期增怵惕蒙生逾廿齡蹉
跎抱殘冊短絆憂汲深夜行懼摘埴當代數鉅公宏獎
每破格良念白華養借以青雲力捧檄慚未能負笈冀
有得幸登大匠門再拜請繩墨

五色梅花幀子歌

兩峯老人如老梅繁枝自倚冰霜開小峯畫梅得家法
遊戲偶然到真蠟輞岡瀟灑披吟衫萼綠秀發東風酣
肖生寄興頗超越硯波一蘸墨飛雪兩家閨秀妙絕倫

小施丹粉仍清新各借梅花自寫照一苞一蕊皆有胸
中春吳生愛梅入骨髓恨不與花同卧起花開歡喜花
落愁願貯好春圖畫裏長安四季花成海擔頭賣花如
賣菜只有此君標格高偶得一株真絕代千花萬朶乃
在尺幅中回枝屈鐵苔蘚青重重寒葩照耀忽五色匠
心所到天無功君家眷屬定仙骨知我性命乃與梅花
同贈我掛向雪色壁坐令寒香繞屋烟濛濛詩成便跨
白鳳去月明正滿四百羅浮峯諸君一笑應相從

訊王蘭泉先生病

數日不相見夢繞東城閨每以賤體孱荷公憂采薪公

體素矍鑠致疾宵有因來伴語未詳把書淚沾巾問安
造閨闔寸中轉車輪服藥告有驗一笑眉爲伸公望重
四海公年近七旬憂勞答

聖主疴癢關生民著書方滿家計日雕青砥至道母眾
才氣象醅乎醅松柏無冰霜葛藟有本根願將度世心
愛此千秋身碩德荷天佑示疾原非真葯煙飄鬢絲靜
卧方怡神佳日道體和杖履當再親載酒絳帷來滿酌
梨花春

題樂蓮裳蓮隱圖

蓮裳與我生同丙戌年我居東鄉之東君臨川兩家相

距不到六十里西疇南陌隱隱相鉤聯吾家伯兄與君
早相識一軍初冠才調聞翩翩已酉仲秋訪我豫章館
傾心半面遂結平生緣秋屏閣外驪唱隔三載相思萬
里寄我瑤華篇我時授經紫陽舊精舍君與伯兄射策
金臺前去年臘月我策薊門騎雪花如席初卸蒲桃轡
得君名紙倒屣出相晤披裘大笑再拍洪崖肩四月伯
兄忽自太原至一樽風雨對話離愁捐九月六日聽榜
夜聯句倚檐仰視星斗光盈天驂騑失足竟與眾馬伍
狂歌擊筑意氣凌幽燕昨爲我作新田十憶賦清詞麗
句往復增纏綿袖出鉅卷索我賦蓮隱誇我長句風格

追青蓮我愧心源病後等廢井斑管憔悴不共江花妍
屏讀君畫忽墮眾香國千花萬葉面面晴霞鮮置身此
中豈有塵世想徑將化爲鷗鷺花間眠夾岸楊柳倒影
漾空綠涼雲深處橫著瓜皮船不蓬不楫意思自蕭散
此君或者游戲爲飛仙我住太華峯頭玉井側花開十
丈上與紅雲連玉女一別二十有七載手把花枝爲我
停星駟題君此畫乃有謫居感綵毫一拂字字生雲煙
是時雞鳴喔喔夜方半月華霜華潑地如流鉛手炙硯
冰寫成六百字君爲朗誦聲徹蓬山顛伯兄卧聞起坐
詫奇絕此詩此畫竟可千秋傳男兒立身要自貧賤始

崢嶸傲骨肯受庸人憐
名山載筆有願不克遂
賞音幾輩更讀齊諧篇
君方著耳食錄低頭日日兀坐軟紅底
西風吹夢只到芙蓉邊
故鄉好景如此不歸去
孤負風裳水佩千嬋娟
何時與君真向卷中住
遙看銅陵碧礪飛紅泉
擁書百城釀酒三萬斛
繞屋但種千頃荷花田

香蘇山館古體詩鈔卷一終

香蘇山館古體詩鈔卷二

東鄉 吳嵩梁 蘭雪

四月出都寄謝王詩亭

友亮

給諫周駕堂

厚襲

李

介夫

如筠

兩編修胡果泉

克家

比部樂蓮裳明

經

所願不一酬此行已三悞長安本難居貌躬況多故吹
衣風漸溫驅車日將暮浩浩蘆溝波蒼蒼薊門樹
雨雪閉南館一燈青對床連枝忽中悴斷雁仍孤翔骨
肉竟如此貧賤安足傷向來攜手地步步摧肝腸
故人袖中詩征客馬前酒忍淚歌不成忠告意彌厚江

天歸路長衰親倚閭久全身憂患中持此謝良友

登岱詩和覃谿先生

日披岱史坐山麓百讀不及身一登連宵快雨天驟霽
筍輿出郭邀禪僧磴道盤旋到林杪老樹怪石森蒼稜
壺天一角跨空立徂徠俯視非岡陵雷霆百戰怒龍出
擘開山骨青峻嶒懸流忽斷萬松舞孫枝亦縛千年藤
天門直上接翔鳳絕磴欲下愁飢鷹七十二家古封禪
芝泥玉檢神依憑

翠華所蒞羣岳拜至今鶴嘯猿歡騰是時山中日亭午
蔚藍鋪遍雲層層長風萬里捲不去破碎乃似春江冰

重陰蕩漾覆齊魯彈丸隱約開田塍全收滄海入盂底
混茫一氣晴嵐蒸平生局促厭塵市如鶻閉籠蛟在罾
此間放眼九州隘變化勢可騫鯢鵬頗聞峯頂夜方半
海霞已擁朱輪升金支翠旗白銀闕蓬萊恨不僊槎乘
山氣蒼然滿城郭斜陽斂盡天澄澄入門未轉北斗柄
覓句急翦南窗燈但將遊覽豁胸臆興酣落筆吾何能
公詩雄秀冠當代墨妙況兼貽百朋車塵十丈拂鞭去
山川奇勝歸行勝名岳有緣許再陟撰杖喜說今年曾
題岱雲會合圖敬酬覃溪先生

思公如一曰別公已四年以我寤寐勞知公懷抱牽東

西溝水流南北浮雲連相羈各人事所隔非山川前歲
過兗州咫尺違旌旃霜風馬首回太息低唫鞭京華二
載居筋力疲周旋虛譽亮何補舊學嗟易捐暮節旅憂
集雪幔吹茶烟把公書三復誦公詩百篇公子頗推分

宜京太史

異聞時一宣示我趨直圖展卷喜欲顛累旬供齋

几瓣香中益虔精魄化明月夜夜明湖邊南歸計已迫
東望心猶懸何期塵土襟共此燈燭筵悲愉念環生俯
仰境屢遷公髮亦稍白矍鑠乃勝先我瘦益骨立病緒
增纏綿慰勉荷再三感但心肺鐫窮途氣不屈慷慨凌
幽燕再拜酌樽酒滿引先生前浩歌七柏下星斗搖青

天時寓於七
柏一松軒

日望岱頂雲昨到岱雲裏哦詩日觀峯海風吹杖履歸
來捲簾坐嵐翠溼於洗對之參畫禪卽以悟詩理小松
爲繪圖游迹粗可紀寥寥尺幅中氣象乃千里公詩妙
波瀾竟茲一丈紙看竹懷昔游論文挾真髓會合句屢
聯韓孟敢竊擬相依甫二句明日公行矣蹉跎念平生
感勵自公始苟活憂患中立身藉磨砥吾母嗟早衰伯
兄復暴死孤立門旣單輸官家盡毀夕雨漏茅屋晨炊
借鄰米迢遙路五千頭白閒倦倚以此歸夢馳因人治
行李觸熱豈不勞承歡更誰恃公鑒烏鳥私春風被牙

齒延譽出大賢酬恩愧人子此行謁軍門

謂制府書公

所謀

但甘旨固知求養難肯抱面墻恥杳杳江東雲悠悠汝陽水校士有新篇臨流候雙鯉

原唱附

翁方綱

覃谿

吳生江干別四十四周莫每追暮雨語北蘭閣秋屏
我思託驛騎生亦緘吳舫石湖白菴卷韓門巽齋銘
不得與子俱書囊拾秋螢重來京國遊凭我蘇室櫺
淹遲換裘葛悲風感原鴿我亦歎伊威誰知復聚萍
執手緒淒咽岱麓荒寒廳是日岳頂雲爲我開層青
方侯翻惆悵不得共簞簞豈忍便捨去二句且留停

病鶴逾清羸風雪慣沙汀消渴卻茗飲溫中煮茯苓
試與對跣趺返觀深杳冥靜中餘習氣悟言徹重局
窗池清泓中銳思驅雷霆千純錦浣江百家水瀉餅
論詩岱東郡上規魯頌駟近師新城叟寤寐石帆亭
竊擬私淑徒賴爾知者聽舊拈百回義頓若新發硎
此會實非偶爲子勤丁寧尙抱區區懷冀子時時聆
麻源王家仲隔戶燈光熒西江谷園侶幾箇偕晨暝
新知收昔遁鏗篋希扣筵因之貫六義借以衷羣經
勿輕一聚合萬卷來精靈神聽必吾許不煩索萁筵
我有敬軒研藻擷南豐馨斐然秋盦子爲寫湖渚渟

以茲墨緣合寫此負笈庭兩峯墨梅軸一吹舊夢醒
聯吟想韓孟二鳥比翅翎東野龍與雲無問神影形
四方上下逐南北何畦町蒼然七株柏質我盟日星
予舊有一領紅衫香欲透滿身風雪拜梅花之句

張雪鴻爲繪圖觀察謝丈蘊山

啟昆

贈詩賦酬

前年題公種梅圖寒花照酒梅影疎今年館公補梅軒
梅子已熟枝葉繁柘溪亦有梅花塢曾畫梅顛訪梅處
滿身風雪拜花前一夜花開溪上樹公爲我作拜梅詩
機鋒電掣天馬馳閨閣傳觀出新句天花散落瓊瑤枝
平生飽閱鶯花海萬紫千紅委塵壻人間不見優鉢雲

只有老梅堪下拜拈花妙諦誰共參望塵有客嗤狂憨
臣甫杜鵑顛米石此拜千載今成三公說前身花是我
明月白雲證因果畫中樹樹江南春公定當年手種人
謝仲蘭詩兼呈蘊山丈

我贈仲蘭字爲作謝生詞謝家三子並英特仲尤秀拔
殊其科謝生十三年正綺眉目如畫氣秋水皎皎臨風
瓊樹枝庭階那得蒹葭倚謝生聰悟天生成冰雪蕩滌
心妙明好書展卷誦已熟建瓴倒瀉銀濤聲新詩作纔
數十首麗藻清思已無偶滿山紅葉雁初飛仲蘭詩汝
中佳句
是蓮洋眞小友詩筆未落神蕭閒弄花掬水皆可觀莞

然一笑得新句其氣冉冉成芳蘭自見蘭雪詩愛之徹
骨髓烏絲小冊扇金泥讀之萬遍錄千紙自覲蘭雪面
晨夕常依依但聆一語已神解脫口爽若哀家梨翁令
執經我門下顧雍名字成佳話余贈生以今字翁有詩見謝曰分得顧雍名字
如心香一瓣國香前玉笋門生丹鳳雛從此蘇山長聲價嗚呼人
生富貴何所求謝公對此百不憂佳兒誰及王文度生
子當如孫仲謀

再呈蘊山丈兼示仲蘭

謝生得詩誦且喜翁亦走謝折展齒我愛謝生如弟昆
請陳古義勗終始薛家三鳳荀八龍機雲二妙傾江東

眉山蘇氏更難得翁孫父子文壇雄童子從來擅奇偉
終賈以後難悉記就中最推李鄴侯賦棋才大能韜晦
九仙之骨一品衣福慧如此生所祈早得美名懼有損
鄴侯傳願生讀書厚根本我長謝生二十年小時了了
中語大不然十五哦詩宰相側葛山先生十九奏賦

宮門前弱冠以後感孤露出無車馬歸無田蹉跎三十
尚低首結交海內空豪賢丈夫窮達豈足計卿相得時
當自致經世之業名山書如此蹉跎成坐廢生之家世
日鼎盛生之年力春方初勉從孝友勵實用莫炫桃李
邀虛譽歲月逼人易驚邁文章報國當早圖他年身八

名臣傳載酒山中慰老夫

曾賓谷

煥

運使修秋楔於九峯園圖成屬余補詩

使君示我蘭亭硯邀我同賦秋楔詩我來邗上後佳節
摩挲此硯方嫌遲圖成補我入橫卷南園未到心先馳
昨賸沙棠徑造飲芙蓉四面香風吹歌聲縹緲尙林末
酒籌狼籍拋花枝卻尋前日洗硯處墨花朵朵搖清池
九峯照窗天貼水湖光捲入青玻璃科頭坐我萬花海
銀鷗雪鷺皆酣嬉蓬萊日暮美人遠賞秋頗憶花開時
去秋法梧門學士招集積水潭觀荷江山管領要文翰一別便有三秋思
永和故事苦沿襲向來秋楔傳者誰會稽名流七十二

俯仰今昔同襟期我得佳硯貯行篋惜無妙手鐫新詞
他年此畫入縮本有客對酒飄吟髭冶春舊社待公繼
達人秉燭非吾欺康山明日踐嘉約雙星已照黃金厄
七月七日賓谷運使招集康山草堂時吳穀人錫

麟編修將入都徐閩齋嵩之武昌余由金陵歸

里題留客圖後兼示同餞諸君

武功當日酣歌地朵朵遙峯潑新翠絕代風流真狀元
肯與此山傳姓字曾公倜儻公後身酷愛名山比名士
揚州無數好園林跌宕此中須我輩露珠涼透天孫裳
二十四橋秋月光樓頭星斗照華譙樓下霧樹連高檣

琵琶聲斷林鴉起倒捲銀河瀉盃底紅燭千條艷奪花
綠雲一片吹成水吳生狂醉笑仰天世無此樂三百年
眼中七子已塵土騷壇拔幟公其先廣陵驛外多岐路
投轄爲公三日住六朝山色又迎人畫我抽帆白門去

銀槎杯歌

元人朱碧山製賓谷
運使得於江氏頡雲

前宵酌我對山樓銀河倒入青樽流我詩有譏果奇中

康山詩有句云
倒捲銀河瀉盃底

舉杯一笑逢張侯斗大黃金印懸肘

探源萬里窮星宿現身忽化酒中仙一朵白雲墮清晝
科頭兀坐槎中央輕裾直欲凌風翔支機片石傳星渚
枯樹何年卧雪霜銀鉤洗出元朝字妙絕碧山誇手製

四百年來任拍浮我笑此翁真骨醉虞揭介壽張華筵
當時主客皆神僊此盃雙舉銀燭前桃花一放三千年
白雁聲中換滄海塵土銷沈舊光采一爵曾聞內府收
三醵卻憶江邨買高澹人草堂名後先拂拭羣公手神物流傳
信非偶江湖隻影豈飄零天上人間同不朽月華秋浸
馮夷宮平湖萬頃玻璃風美人濃笑持碧筒酒波滿瀉
眞珠紅浩歌手把雙芙蓉竟疑跳入仙槎中吾儕得酒
且快意富貴長生總遊戲蒲萄一斛換涼州如此胸襟
定奴隸誦君長句追昔賢痛飲爲君歌此篇醉鄉佳話
從今補壓倒錢唐藥玉船

袁存齋先生招飲賦呈

我生十五齡早誦隨園詩謂公天上人雲騶安可追十

八謁藏園

謂蔣辛翁先生

聞公事益詳知公宏獎寬說士如歐

陽十九來金陵獻賦拜

行殿謂當從公遊景行愜私願公旣在羅浮我亦之大

梁一去四千里相思天各方前年賦北征艤櫂過錢唐

欲和生輓詩雙鯉無由將京華居歲餘結交多老蒼聞

公復告存

公自是更號存齋

夢寐依公旁比從邗上來公先往

潤州咫尺阻良覲寸念翻百憂尺書到天外豁然開病

眸思公公已歸招我隨園游

出城二十里瘦馬踏寒煙到門日將暮斜照山蒼然徑
花迎我笑雛鶴導我前公手執我裾謂我有夙緣愛我
西湖詩訪我心拳拳昨接故人書給諫王神交知我先
蒞亭丈傾矜自茲始誼比金石堅座中王右丞夢樓先生抵掌喜欲
顛謂公眞賞同如以月印川筆琶競繁響桃李爭嬋娟
正聲難爲聽正色難爲妍澹埽矜蛾眉古瑟調朱絃意
外受公知酬知當百年

公才本謫仙公生寶間氣七十有八年佳世等遊戲前
身爲白猿名山居點蒼吟嘯五百載引臂秋風長幼夢
筆萬枝束桴浮大海笑坐浪花堆中流殊自在弱冠舉

鴻博王公驚少年逾歲入翰林靈鳳翔九天高才不受
羈誤寫上清字飛鳥墮江南牧民號循吏一薦高郵牧
掛冠三十餘甘棠念遺愛乃卜金陵居江郭古名都六
朝萃佳麗扶路有門生看山載歌妓九老香山社萬首
龜堂翁高卧今白頭處處圖屏風

隨園地幽勝購自城北隅林泉本天設位置皆畫圖萬
竹圍短籬穿竹徑轉紆小橋俯流水漱灑明雙湖一朵
小倉山秀絕當庭除山中日日雲溼翠霓衣裾貯書十
萬卷栽花十萬株花開公飲酒花謝公讀書玻璃環五
色斗室成方壺照耀窗外花樹樹成珊瑚燒鐙蕩蓮艇

吹笙迎板輿有婦舉鴻案有兒稱鳳雛奉母四十年此
樂天下無立言已千載馳聲溢九區我來公尙健公在
我不孤結鄰願可償執役甘樵蘇

別隨園梅花寄存齋丈

朝載一壺酒暮攜一卷詩出門卽詣公嘯詠無還期老
梅公手栽花開七百樹桃枝竹杖筍皮屨尋公只在花
深處前日飲花前與公約良會願看十分開不辭百回
醉紅梅花正繁綠梅花尙疎江梅一白雲模糊陳公浦東
招我遊姑蘇欲行不行心鬱紆聞住花喜歡聞去花太
息隨園日日人看花難得疎狂如此客公怨我行早我

惜花開遲別公旬月復相見探花便與明年期瀕行酌
酒拜花下祝花盛開莫先謝繁枝壓帽花滿衣人影梅
魂都入畫蒲帆百尺東風顛背花竟放丹陽船漠漠江
天搖槳去一行澹柳鴉無數此時初月正黃昏此際空
山合斷魂別公三日花無恙一度相思一惆悵維舟昨
夜聽吳歛水調聲聲玉笛孤夢到花間仍痛飲暗香吹
雪滿雙湖

送東浦方伯還江甯

明月當花盃在手與公同命瞻園酒晴雲照水帆插天
與公同放胥江船行館論詩旌節駐座中徧誦吳生句

當代風流賴主持黃金如山酬一顧濛濛細雨卻迴舟
公到園花開更稠感知惜別千行淚今夜憑添江水流
二月十五日微雨獨遊山塘至花神廟沽酒爲壽

薄暮始歸

前日花朝雨如注兀坐官齋憶芳樹今日花朝天稍晴
訪花竟出麋湖城柔櫓一枝劃江水兩岸鴛鴦初睡起
紅樓映水柳著烟春愁已漾玻璃天倚棹微吟江令句
東風又送廉纖雨衝寒直上白公堤溼透春衫渾不顧
觥船春暖花四圍美人吹笛雲不飛花前今日無人醉
墮白飄紅苔滿地我來載酒獨銷魂手把花枝勸一樽

未到全開猶寂寞誰從已謝更溫存花神似感儂情厚
吹送香風滿襟袖願儂長作探花人願花共醉延年酒
百花生日無歲無今朝難得在姑蘇帽檐壓花扶醉去
待畫山塘被雨圖

畫梅歌答吳松崖

松崖畫梅頗自矜十人乞畫九不謦誦我新詩愛徹骨
寫生特爲裁溪藤匠心慘澹脫手快墨花箇箇銷春冰
繁英照天白鳳舞怪枝拂水青蛟騰吾詩標格此花匹
玉立不受風霜凌京華傳寫集眾妙花光五色收行勝
得君此畫益狂喜題句再翦花前燈卧遊今夜到元墓

笛聲吹破雲千層

湘花詞爲劉大令松嵐

大觀

家姬賦姬氏周蘇州

人姿性慧麗余與松嵐約遊靈巖過其寓館命

姬出拜贈以今名潘農部榕臯

奕簡

爲畫湘花

圖松嵐屬詠其事湘花將繡余詩以報云

館娃宮外花如霧一種幽蘭抱心素紫蝶黃蜂不敢過
天與才人特珍護長卿佳句妙當時到處旗亭唱竹枝
三生來踐尋春約一顧先邀曠代知鈿車迎嫁歸金屋
羅幔催粧圍樺燭大婦當初見亦憐新人自倚顏如玉
玉貌天然愛澹粧秋雲葉葉翦衣裳黛痕薄掃春山溼

花氣徐吹晚鬢香故人酒半傳佳話自捲珠簾催出拜
環佩遲來訝已仙風神側坐偏宜畫滿靨紅潮笑未成
可憐眉目盡聰明湘花小字親題贈露朵全開悟隔生
隨園詩叟眼如月一見湘花歎殊絕心賞由來眞色難
面諛直願僊齡折水雲妙墨出清新農部別字水雲漫士香影枝
枝替寫眞風前一笑無羣卉鏡裏雙花是美人冰綃持
贈花應語氣味相憐但儂汝錄名從此艷宮閨採佩何
勞隔湘渚劉郎前度訪天台曾傍紅雲艤櫂來素心一
朵能專寵干樹桃花不敢開人間零落多芳草玉蕊盈
盈開獨早洗硯熏衣過一生女兒都說湘花好銀鈎宛

轉寫烏絲敢向嬋娟責報遲
唾絨五色臨花坐親繡吳
生本事詩

題潘榕臯農部歸帆圖

布帆插天風力飽順流人說揚舲好
青山萬疊擁江南
一笑先生卸帆早歸心黯澹畫新田
我別春明已隔年
夢吹漁笛渡江去鄉月照人花壓船

題馮巽泉

鼎高

太守秋釭補讀圖

矮屋打頭塵襲几五夜單衣如潑水
此時兀坐手一編
寒燈作花小於米盛年意氣矜巍科
出擁騶衛冠叢叢
此時萬卷束高閣華筵列炬酣笙歌
甘苦不深乃輕棄

始悟從前讀書僞要從經術發事功但習詞章等游戲
三山儒者推大馮綵旗青蓋來雍容膏澤已看吳會遍
醞釀卻本詩書中自言爲學心難滿汲井愁深縷愁短
退食能偷寸晷閒焚膏願祝更籌緩名園一頃寬有餘
韋公高韻流姑蘇清香畫戟宴游地縹緲壓架丹黃俱
明月墮檐雲繞屋空池古樹生寒綠絳蠟燒殘銀箭長
老鳳清聲出深竹官吏竊笑僮僕疑公自能誦渾不知
案牘如山目如電治事卽在觀書時此州民事號繁富
公政不苛才獨裕此州士習尙雅馴公教旣洽風亦淳
春鵬能歌花解舞棠陰日日聞簫鼓寒缸一點坐深更

得力誰知在政苦我來吳下觀政成同時執政皆名卿
緒論側聞見根柢新詩妙絕兼箴銘酒酣狂詠摘星斗
忽漫展圖重低首歲華如此擲風塵舊業無多半榛莠
石渠校書藜杖燃玉堂紅燭圍神僊文章經國自有待
名山何忍孤千年人間榮悴如春草結網臨淵計須早
典衣明日買歸船閉戶誦經貧亦好

王雅宜山人野菜譜元和令賈約園屬題

有序

按譜共二十四幅前明嘉靖癸未春六日雅宜
山人畫於石湖草堂其自序云正德庚辰間三
吳迭遭饑饉民摘野菜以食活者甚眾然或誤

採至傷其生故繪爲譜俾詳覽焉畫端各係以
詩獨缺野苣菜一首嵩梁擬作小樂府書於冊
尾并賦長句以歸約園知昔賢窮居不忘濟物
非僅其詩畫爲可傳也

譜成有序詩自箋三十四種羅芳鮮一莖一葉得真態
墨痕著紙春如煙雅宜山人王履吉三絕才名妙無匹
零縑剩楮亦清新三百年來傳此筆當時吳中飢饉仍
石田如海無人耕園蔬再摘苦難繼野菜一箸甘於羹
西家少女挑菜行東家病叟攜筐迎採當易盡擇何暇
食或不慎戕其生山人體物如老圃親到畦邊問甘苦

畫成一幅吟一篇滿硯松花淚如雨抱蒿孃與看麥孃
聞名觸類皆可傷官府但知急租稅骨肉誰與收流亡
此畫持之能救荒此詩讀之先斷腸吾儕窮達同一義
於世要當期有濟不將痛癢關斯民何取風流誇絕藝
賈侯彈琴坐花縣士女三吳歌舞徧生平能領菜根香
讀畫如披循吏傳豐穰連歲絕追呼村村泥飲遭田夫
菜花千頃黃金鋪暖風遲日飄春駒願攜此冊游石湖
州堂俯仰今昔殊一笑請畫幽風圖

野莧菜效雅宜山人體

野莧菜生苦少今年葉好根亦好往年花開賤如草

陳耳庵

鴻緒

牛背讀書圖

江南好解元乃作跨牛客牛背一本書朗誦聲至夕長
安車馬塵漲天誰及此君意閒適山鳥一聲杏花白我
願驅牛柘塘側耕牧養親計殊得讀書不成且吹笛

題熊謙山

枚

廉使紅鷺香稻圖

名山千載泉不枯紅鷺浴處今爲湖繞湖種稻三百畝
水田面面山雲鋪湖山佳處公結廬清流抱村花壓渠
靈雨三日膏于酥東臯南陌農歌俱溪烟漠漠白鳥下
犁泥活活黃牛扶公方兀坐身擁書禮耕義耨皆膏腴
喜聞布穀喚深柳出門一笑幽懷攄脫巾自漉元亮酒

帶經或荷倪寬鋤二紅新飯尺半魚此樂俯仰真有餘
軟塵如海蔽九衢出擁大旆分銀符故鄉暫返若行旅
板輿小住遷洪都此山一別十三載夢中涼翠沾衣裾
好官只要士民愛生計那管田園蕪前年持節來三吳
居不閉戶行讓途年豐氓樂吏清暇歌詩往往追王儲
此畫約略寫鄉思龍眠筆妙今所無華吉筆釣游指說某
山水風光飄動銀髭鬚孫枝玉立特英秀天馬作駒丹
鳳雛盛德如公福亦備名在竹帛光粉榆我行萬里爲
飢驅破家無計償官逋衰親兩鬢白成雪打門終歲聞
催租才名畫餅嘆何益竭力不及傭耕夫感公至行思

反舖題公此畫心鬱紆柴門亦有好山色歸夢昨夜馳
香蘇

繡詩樓歌次韻答王夢樓太守

周湘花女史繡余夫婦石溪看花詩

卷以樓供之太守爲賦此詩

美人繡詩樓入畫畫樓未成先貯詩石溪春水照欄檻
紅卧桃花青柳絲絲繡出簪花字字與詩篇同細膩
錦心繡口讓何人七襄妙奪天孫織江樹江雲喚遠愁
故園迢遞隔清遊照淚鶯花城外寺斷腸歌吹竹西樓
先生詞翰連城壁持向溪亭贈歸客金鍼卻肯度詩法
繭紙誰能仿書格芰荷香泛碧螺尊佳句流傳共使君

謂曾公
賓谷

錦字回文今再得弓衣絕唱古曾聞六尺生絳
雲一段滄江夜月虹初貫綵筆連朝酒後酣芳筵明日
花前散驪珠滿載越船歸重拂秋琴捲翠幃小築何年
臨水就鷗波十里漾晴暉

原唱附錄

王文治夢樓

彩鸞夫婦詩如繡瑤英拈繡腕有詩十二瓊樓霞萬
片化爲人間五色絲兩首新詩八十字鳳凰和鳴曉
鶯膩當時挽手石溪行花光十里春烟織才子從來
多旅愁青春還作吳門遊飄零月下吹簫市冷落雲
中寫韻樓劉郎重友逾趙璧藍橋特出傾城客心感

多情黃絹詞鍼神摹就簪花格不繡西方兩足尊亦
復不繡平原君以詩爲繡心良苦以繡酌詩古未聞
一幅瑤光錦繡段蠅頭排列明珠貫弗惜春纖挑刺
勞轉愁落紙雲烟散蒲帆早晚溯江歸對展還應向
繡闌想到雲鬟繡衣溼繡詩樓上倚清輝

鶯脰湖

平生愛說鶯脰湖扁舟未放神先祖前年過此夜已半
蕭蕭寒夢依依菰蒲今年端午客吳下綵船百棹笙歌俱
傳聞此地更繁盛萬花如海龍所都我來江郭值秋首
但看湖影涵清虛鞞紋細蹙晚風定練光橫捲餘霞鋪

布帆葉葉送歸客。畫檣枝枝搖晚漁。紅蓼叢邊沙激出。
白鷗沒處遙山無。水天如此極幽賞。管絃底用矜吳歎。
徑思手築一茅舍。特來補種千芙蓉。人間俯仰足憂患。
眼前清境留須臾。秋風一櫂踏雲浪。釣竿去拂青珊瑚。
七月四日由淨慈寺放舟西湖。徧覽諸勝。夜泊荷
花中。獨飲至醉。

我與杭州別三載。夢魂苦爲西湖牽。昨夜蒲帆卸江郭。
喜如道渴逢山泉。侵晨欲出苦未暇。買舟直待驕陽偏。
淨慈寺外水拍岸。垂楊幾樹飄殘蟬。葛衫芒履扇如雪。
湖光一照俱翩翩。畫橋曲折導幽嶼。危樓窈窕臨平川。

荷花開滿五千頃，葉大如蓋高枝駢。浮萍破處，倒雙影。
紅粧浸徹，玻璃天。花光欲斷暮風出，北山遙與南屏連。
峯巒到此盡，縹緲蒼虬掉尾青。鸞鶻疎鐘迢遞度林末，
破空新月來娟娟。映花著水態逾妙，蛾眉一笑流清妍。
打門沽酒邀月飲，香風吹我湖亭邊。移舟更入萬花裏，
鴛鴦鸂鶒皆酣眠。自臨江水翦銀燭，但欠女手調冰絃。
暗螢結陣星點亂，驚魚擲影波紋圓。中流回望好臺榭，
朱欄碧瓦吹成烟。卻憶前年繫歌舫，振衣直上孤山巔。
寒梅未花月正滿，鶴聲夜半招逋仙。美人禁寒倚篷檻，
玉簫入破山雲穿。再來便有今昔感，一行暫結湖山緣。

手折花枝揖明月，浩歌起舞青樽前。
不辭痛飲便達曙，此別俊遊當隔年。
會約故人共幽築，且覓新句書蠻箋。
明朝單櫂溯潮去，富春青到嚴州船。

錢塘江晚潮

海潮一線從天來，白日當空聞怒雷。
奔流去比萬馬捷，叠浪倒捲千山迴。
我舟一葉逆潮上，峭帆舞入銀濤堆。
蛟涎腥溼濺衣袂，蜃氣眩轉疑樓臺。
奚童惛伏我狂嘯，詩卷落手茶翻盃。
乘風破浪自此始，書生意氣何雄哉。
潮勢稍平櫂歌發，鏡天上下光徘徊。
江郭斷紅尙斜照，遙山潑翠如新苔。
晚涼貪坐倚篷背，玉樽自瀉蒲萄醅。

酒酣便跨白龍去天風浩浩吹蓬萊

七里瀧

錢塘潮滿連桐江一日已到七里瀧雙槳無聲片帆飽
萬山飛舞來船窗峯峯壓雲吹不起積翠空濛化江水
一天秋影瀉冰壺破月如瓜墮江底榜妾意態閒鷗閒
臨流自約雙鴉鬟教就竹枝能緩歌酒鱗搖綠生微波
前身我亦羊裘客漁弟漁兄共酣適蘋花風過酒初醒
一枕江天聽吹笛

甲寅鄉試以違例被放諸公皆爲惋惜感賦一篇
槐花忙過十四年狼籍秋衫浣塵綠新詩傳唱滿江淮

破帽低頭更場屋棘闈辛苦九晝夜文字雖工猶刻鵠
恃才何敢縱波瀾放筆誰知窘篇幅蕊榜未出解先落
積勞盡棄咎難贖老婦孩兒忽倒棚疲馬鹽車至傾轂
何當慰藉徧友朋頗聞歎詫到僮僕薦士豈乏韓退之
學使沈公雲椒以梁至後期免其補試錄送貢院失意竟同李方叔猥誦佳句
感左丞觀察陳公松山沉逢盛餞出都督中丞陳公蒞洲幕府欲留嗟
未能鄉園已近駕宜速自知骨相太寒薄請謝諸公卧
林麓天陰臂痛心忽馳日暮雲飛鳥相逐倚門慈母雪
盈顛歸掩蓬茅共蘼粥

陳迦陵先生紫雲硯歌爲蒞洲中丞作

硯陰有銘不見紫雲

重見紫雲摩挲久之松麝
氣氤捧持何必石榴裙

美人一別秋雲高誰持紫硯看揮毫芙蓉落手濺紅淚
新詞妙絕兼離騷水繪園裏千枝花湘中閣上雲爲家
當時醉墨染歌袖未煩綵筆呵吳娃鸞坡下直鑪香熱
五尺桃笙擁寒鐵匣中紫玉不成煙天上瓊枝應化月
百年詞客風猶霸手澤芬芳帶松麝細字深鐫太有情
美人名硯俱無價官閣裁詩畫燭燃三生片石留清緣
我願補圖公小像紫雲捧硯萬花前

王摩詰江皐會遇圖

春波一碧奩鏡光春山一抹蛾眉長六銖衣帶白雲溼

水邊笑語春風香珮聲漸遠江波涼美人不見天蒼茫
右丞落筆極妍妙摻手想見神清揚當時兩卷並神品
宣和御府同收藏此卷千年重聲價鑑別僅存顧與梁
墨緣再結廣川董借觀嘆絕瑯琊王唐老德幾手題在
惜哉兩跋俱未詳使院秋陰日展卷琪花玉樹猶芬芳
人間何處得此境絳霞秋疊水一方羅浮風雨感離合
延津龍劍看騰驤墨妙有靈必繼出請從畫理參毫芒
君不見岐王宅裏石飛去化作芙蓉歸海航卷中雙影
會飄墮驂雲一笑青鸞翔

題白庵吳娃飯牛圖

君不歌白石爛儂不踏金蓮花青芻滿把飯烏髯霜明
兩足鬢堆雅吳下沃壤天下無稻田千頃圍石湖茶磨
山翠落春水一行晴雪飛春鋤此時驅犢吳娃俱笠影
衫痕皆畫圖叢篁老樹歸逕紆斜陽吹笛聲鳴鳴山花
濃笑滿頭插不知世有傾城姝此時飯飽縱牛卧鷺黃
酒可傾千觚妖姬十二釵寶馬三百匹富貴庸奴吾所
恥耦耕有約偕吳儂願君但作多牛翁

題硯齋觀察竹磻清陰卷

百花巷口雲遮屋好句鐫題徧新竹冰絃罷撫山月高
磻水泠泠瀉寒淙畫裏山公雪滿顛龍孫手種亦參天

滿身翠雨攤書坐詩夢低徊四十年

易硯詩爲陳季馴孝廉作

一詩酬一硯蒼龍入匣江濤濺一硯換一詩鐵網下罾
珊瑚枝齋舍落成畫作圖芭蕉葉大梧桐疎萬花落筆
墨傾海李投瓊報無日無我貪得硯嬾作詩君未首肯
心先知坐踞秦城索趙璧背城一戰挑偏師我詩不往
硯不得十斛明珠聘傾國君硯必佳詩乃工千金寶劒
歸英雄請君硯材選第一青州絳州妙無匹殺墨如風
膩似雲倒落紫潭星斗溼我持長句道謫仙酒酣高詠
聲徹天不然棄擲苦海底硯可不酬詩不鐫

季馴見贈雙硯再酬以詩

吾詩落筆蛟怒騰主人擊節山欲磨翠濤金線恣擇取玉
光可鑑松烟凝宋代宮製數第一質純體重如良朋綵娥
想見滿春殿羅袖捧侍依觚稜白雁吹來宮草徧蟾蜍涓
滴收紅冰別有瓦製漫堂物仁熙爲壽貽中丞清池半月
紫瀾漾斷紋幾抹秋虹昇綿津吟社久寂寞持此當與君
代興一詩兩硯許破例公然連璧歸行滕騷壇拜將吟侶
賀墨華濃結雲千層戰勝爲君賈餘勇雙鵬仰射吾猶能
弟子梅枝山未畫竹易硯題此兼柬季馴
梅生不畫梅乃畫秋竹枝持以易佳硯頗勝先生詩我

不解畫竹能爲畫竹歌歌成擊碎竹如意蕭蕭翠雨吹
簾波君爲黃魯直我是張文潛得詩不嫌貪得硯無傷
廉乞君贈我洮州綠一片風漪浸寒玉冰壺墨醖詩夢
酣再約梅生來畫竹

文潛得山谷所贈洮州綠石作冰壺硯各有詩載集中

題白庵蒔菜小像

春畦過雨曉微溼種菜人同荷鋤出一籃新翠映衫痕
笑軀雙鬢背風立早韭寒菹味有餘僦居偏愛近東湖
雲卿生計能重理多恐前身亦姓蘇

九月十七日夜同蔣藕船

知讓

樂蓮裳坐藏園池

上追念湘雪茗香舊游兼呈秋竹

知節

明月不到水敗荷葉滿池秋雲黯澹紅倒卧芙蓉枝故人此促膝石徑蒼苔滋風笛斷遙響露蛩生夕悲零落感骨肉歡會懷別離清景我猶共昔游君所思門外墓草長魂魄應相隨

湘雪茗香俱厝園後

題魯習之

嗣光

谷園傳經圖兼寄覃溪先生

與君交七年相賞非浮名出處豈不殊寤寐常合并維我覃溪師拔君冠羣英瓣香熱谷園仲叔同締盟易禮各精研溫溫弟與兄日校書百本文共鐙一檠我住蓬鶴軒

使院所居

講藝每側聆寸莛發黃鐘敢先數子鳴

師贈別詩

云真氣必我應

長風送哀雁鳴咽秋渚聲龍沙一判袂

別離兼死生同學二三子相聚如秋螢淹忽負重九籬

菊卧縱橫落葉不能埽西山依舊青展卷續前夢因之

雙淚零

己酉九日餞師於北蘭寺繪秋渚圖紀別

君上長安車復侍授經席載酒辛鄧從敬堂名理日共

析我畫香蘇山秋林埽行迹贈言感若翁古誼照肝膈

尊甫山木先生爲予序香蘇草堂圖獎勗備至君隨安邑行原鴿慘分翼純之隨父

之官歿哭兄腸九迴庭趨強歡懌我繼游長安連枝復

中折淚盡蒼天高一棺附歸船師門千里遙聞此益愴

惻相見汶水陽岱雲黯無色失父君益孤養母我無策

遺書空滿家丹黃爛手澤庭訓與師傳後死有專責詎

勉憂患餘閑門理殘冊

兩君治經義我但習歌詩執業有本末同受大匠知治
經如藝稻耕耨無曠時嘉種及秋熟乃救蒸民飢學詩
如種樹固本而扶枝氣候備暄潤蓓蕾爭榮滋深造願
各穫不以流俗移所貴性情厚華實皆相資君氣養益
醕君志絕外馳讀書善積理爲文無蔓詞我詩頗有法
力薄心難追飢鳳但清嘯驚馬慚不羈師近惠書稱余
詩如鳳鸞長嘯
於山川之表又發南昌有述詩云我刪江西什若生後
勁稀二吳倘其亞天駟不容羈我愛蘭雪生造意每八
微二吳謂余與照南也感君記十憶悱惻歐曾遺書此贈君別孤
賞懷吾師君爲余撰新
田十畝圖

以芋魁分送藕船白庵蓮裳海樵兼用誌別

連日歸思馳臨餐食指動芋魁三百頭租船竟分送此
物產吾鄉磊落本殊眾土芝號君子能適飢歲用我乏
二頃田賴此一區種寒蔬入品題園叟極培壅啖蔗卽
偶甘採芹豈足貢念是慈母遺持與故人共逸少致來
禽范雲設甘粽風味希昔賢軼事給吟諷投君袖中詩
酌我花下甕西風吹酒波惜別淚俱凍

送蔣二秋竹赴湖南軍幕

蔣侯四十負奇氣讀有用書通鈐韜一官低首志不展
投筆逕赴軍門招

聖神久化被八極生成自外矜三苗上公出將秉旄鉞列侯用命兵不驕瑊戈十萬指黔楚大甲

天紀殲鯨梟盤瓠遺種久滋蔓五溪慘澹烽烟交大小

天星

名

險尤絕萬仞壁立羣山包惡箐插天漲毒霧古

洞絕底蟠蒼蛟此關一奪勢瓦解四十八寨摧蓬蒿我

師神速賊驚竄黃瓜寨破臨烏巢

名

刀光如水萬馬寂

陣雲壓幕江聲高困獸走險挺不下窮魚入釜生焉逃

君策單騎間道入直渡樟柱

名

趨松桃

名

巨礮雷轟箭

雨集戰血所過聞腥臊帳前下馬但長揖牙旗十丈風

蕭蕭陰符六甲圖八陣天人妙算窮秋毫欖槍墮地鼠

穴淨干羽敷化邊牆牢行將勲業紀銅柱定有歌吹傳
簫饒我愧論兵少奇策蠹魚枯死真無聊乘時報國賴
公等殺賊草檄誇吾曹況有慈母弟能養內顧已免心
增勞功成且擲印如斗五嶽待子同遊遨

仲冬五月藏園夜集酬周載軒

厚載

編修楊西河

倫大令陳碩士秀才

用光

兼別藕船白庵蓮裳

藏園老梧葉滿地寒月墮林生暮煙花開銀燭酒傾甕
霜氣不到青樽前百年此地盛風雅竹石皆締文字緣
綺裘烏帽坐接席新詩落筆鸞凰騫吾儕聚散感星斗
浮生富貴飄風鳶共拚痛飲徹今夕可惜嘉會成離筵

笛聲嗚咽度江水布帆飽掛章門船蘇山雪後早梅放
歲宴合寄懷人篇

絳雲曲爲陳硯齋觀察作

使君愛桃花特種瑤池樹一春紅可憐吹作燕支雨爲
雨復爲雲相思夢見君鴛鴦飄繡帶蛺蝶畫羅裙裙帶
弄參差風前不自持黛痕春岫溼心事曉鶯知鶯啼春
未曉夫婿朝天早親捧紫貂裘熏籠烟尙裊烟盡曉窗
寒霜濃翠袖單病中愁擗管粧罷怯憑闌闌干十二曲
細雨生苔綠不見捲簾人落花紅簌簌花落更花開年
年酌酒盃一歌絳雲曲天上散花來

題丁小元進士歸耕圖

有田不歸如江水大峨仙人語復爾香秔給炊秣供釀
一棹江南可歸矣田家歲月歡有餘帶經尙荷倪寬鋤
隴頭牛笛暮雲碧溪上鷺簑春雨疎況有老母待歸養
兼以佳兒能讀書欲歸卽歸何踟躕我意先生田尙無
寫圖寄意偶然耳鳳泊鸞飄又如此辛苦年年事筆耕
腰鑣羨煞隣家子

香齋山館古體詩鈔卷二終

香蘇山館古體詩鈔卷三

東鄉 吳嵩梁 蘭雪

嘉慶元年主講興魯書院謁尙賢祠祠祀晉內史
王公羲之康樂侯謝公靈運唐刺史顏公真卿
宋中書舍人曾公鞏 國朝戶部侍郎李公紱
建祠者前撫州太守陳公朗也

內史澹宕人抗懷塵壙表書法乃緒餘千載亦云少風
流被此邦絃歌遺韻裊誰尋洗墨池白雲照清曉
謝侯山水癖所至窮深幽靈谷春草香濯足清溪流芙
蓉麗初日佳句不可求履齒幸無恙我願從公游

魯公領州牧忠臣故循吏其筆森有芒殺賊氣猶厲龍
跳虎臥書歛入仙壇記廣平賦梅花冰鐵能自媚
文定湛經術不與才士羣氣和理益粹吐納爲春雲溪
山訪遺構松桂含清芬造士有根柢請誦先生文
侍郎儒者宗功名豈從盛所學盡人倫亦原尊德性尙
友陸青田立朝范文正私淑從諸孫竊爲吾道慶

王元章梅花硯歌爲季馴作

九里山中花萬樹天與山人養貞素自攜佳硯寫橫枝
墨雲狼籍花深處五百年來香透骨琅函乍啟松烟溼
美人一笑暮天寒中有吟魂呼欲出我愛制硯工頗深

花影玲瓏拂硯陰平生煮石山農手曠代西湖處士心
空山月落啼么鳳老筆疎花俱耐凍伊呂功名一卷書
誰知才大難爲用此硯相隨不計年此花開後海成田
零縑剩楮千金價何況琅玕姓字鐫君家藏硯有高樓
得此應居最上頭花時洗硯春冰滑漠漠寒香共水流

藏園池上與師退話別

去年我來花已謝君與白庵醉花下今年我來花未開
風枝露葉俱徘徊香楠峯下好山圍別後相思更掩扉
夢到藕船君不見月明涼浸水鷗衣

書宋搨王大令保母帖後帖凡百有十七字字十

行行十二字其文曰郎邪王獻之保母姓李名
意如廣漢人也在母家志行高秀歸王氏柔順
恭懃善屬文能草書解釋老旨趣年七十興甯
三年歲在乙丑二月六日無疾而終仲冬旣望
葬會稽山陰之黃閑岡下殉以曲水小硯交螭
方壺樹雙松於墓上立貞石而志之悲夫後八
百餘載知獻之保母宮於茲土者尙無毀焉自
仲冬以下十字及卷尾三字皆漫漶不可讀題
跋甚多姜白石考据最詳詩中所載其大略云
黃閑岡下山靈泣王家保母墓碑出雙松樹摧貞石沒

天與名山留此筆嘉泰上溯興甯前八百三十有八年
支床壘塔收殘磚一珠一字光徹天官奴運筆誰能掣
弱冠摘毫已超絕書後蘭亭十二春此碑早敵山陰帖
一代芳名推李媛追述徽音淚如霰草書旣工文亦善
茂漪道韞應同傳惜哉妙蹟無人見曲水小硯交螭壺
平生所愛葬與俱此硯旣出壺不得錢清耳孫增太息
諸公先後能鑑藏拓本摩挲霏古香煙墨數行堪不朽
文字須關性情厚襁褓恩深思反哺昔賢高義今或無
金蟬墓碣並千載繼大令者眉山蘇嗚呼昔賢高義今
或無

秋亭載酒圖詩夢歐亭在興魯書院後圃故郡守
陳公太暉築此以擬醉翁夢歐其別字也於時
晨旭初升林雨猶滴松聲繞屋苔色上衣遙望
銅陵諸峯如芙蓉新浴秀出雲表梁與公別十
一年矣授經餘暇間攜二三學侶追懷昔夢覓
句秋陰得古詩四章從游皆有和什梅生杰繪
冊以紀題其首曰秋亭載酒圖者少司空李適
園先生也

昨夜疎雨過秋聲滿庭樹山禽驚乍啼松毛落無數葛
衣延早涼棕屨愜徐步一徑碧苔斑幽香襲風露

平湖醉太守秀句吐天葩高秋此痛飲題詩烏帽斜騎
駢十一載舊館樓煙霞猶有載酒人來踏牆陰花
講席承前芬同人集清暇晚晴桐葉疎深翠竹枝亞文
字歡有餘林塘澹如畫廬陵一瓣香風流被亭榭
江郭媚斜照五峯沐新秋浮嵐一萬疊迸作蒼雲流茲
亭雅足記諸君況從游看山有佳夢吾亦思滁州

陳葯洲中丞廬山觀瀑圖

石門五千仞奇秀如削鐵玉龍怒欲奔岩岫乃中裂雷
霆百戰笙鐘酣天半珠簾捲晴雪山骨洗透青芙蓉浮
嵐溼翠俱濛濛怪石吐雲雲抱松萬態收入銀濤中洞

庭張樂惜未逢湖山到此觀始窮匡君一別十三載臥
遊何幸今從公公才大於海江漢皆朝宗卽溯詩源亦
星宿此水敢與爭清雄婁江畫筆老無敵綵毫一擲成
秋虹圖公笠屐到林壑展卷謾謾來松風我聞宋綿津
畫像開先寺商邱前後兩中丞漱玉餐霞共高致請摹
此本歸廬山薦以秋菊供寒泉銀河萬古落天上下界
仰視空雲烟驂鸞遊戲公其僊

送陳叔魯承蔭入都

叔魯倜儻未三十意氣公然橫九州酒酣斫地劍花碎
匹馬去作金臺遊黃金臺高一千尺

聖主求賢方側席

詔選卿才出世家勲名奕葉承

恩澤君家兄弟不可當八龍三鳳爭翔翔季弟才名壓

秋榜

謂季馴孝廉

伯兄綵筆排天閭

謂伯恭學士

君才絢爛極雲

錦君性溫粹侔圭璋卽令埋沒蓬艾底異采映徹青天
長高門望重鳴珂里冠代遭逢況如此梁苑看花綺歲
先漢宮題柱新銜美我愧蹉跎今十年賣賦祇用長門
錢壯遊倒屣徧吳越狂歌擊筑凌幽燕中丞愛才恕顏
放布衣長揖軍門前與君兄弟雁行齒文字骨肉心纏
綿君今去作僊曹長粉署含香氣蕭爽

天恩溫透宮錦袍不畏燕山雪如掌華筵絲竹酣清宵
羣公入餞皆賢豪紅粧促坐留髡酒寶匣臨分贈呂刀
樽前繁蕊綻宮燭門外老樹吹寒濤扁舟明日渡江去
一聲畫角霜天高東華簪筆多吾曹尺素不寄心爲勞
見君一語憑問訊我仍痛飲歌離騷

寒夜用東坡聚星堂雪詩韻東西河芙初

空庭老樹無多葉天氣驟寒疑釀雪養疴三日不出門
籬院蕭森屐聲絕露蟲入砌響益悲風鵲抱枝愁欲折
瓦鈔細煮藥氣濃布幔低垂茶篆滅壯年三十心早灰
憂患千端肘頻掣蓬蒿自分守秋根桃李從教鬪春纈

還家幾日慰漂泊感舊無端共酸屑文章畫餅身後名
富貴浮雲眼前瞥打鐘掃地願未償落溷飄茵怕重說
梅花欲白歸夢淹幽卧不妨衾似鐵

七月將游吳越述懷五章

偏側復偏側故鄉難久留入門各自媚出門何所求亦
有堂上親白髮已盈頭亦有閨中婦窈窕咏河洲團團
未一載俯仰生百憂惘惘賦新別栖栖成遠遊

阿母聞我行告我語苦悲汝父沒十年家難勞於絲汝
兄復暴天旅櫬來京師嗟汝祇一身勞悴兼公私官逋
幸已赦營葬憂無資汝去須早還窀穸毋後期逝者獲

所安吾當甘粥糜

阿婦聞母言牽衣重悽惻謂君但出門奉母實婦職母老須扶持跬步隨所適母疾須旨甘鬻釵尙可得嫂孀而姪孤相依共晨夕居貧妾自能遠行君自惜

兒跪白阿母不孝罪難量負土兒力殫願母身康強執手語阿婦斯遊亦有方賴君奉菽水慎弗悲糟糠

碌碌薄笨車草草行客飯初日暖征衣秋煙被長阪今日宿許灣明日過臨川孤帆從此去吹笛暮江邊

出門何所詣言附東南船吳越我舊遊執政多大賢堂

堂三方伯

謝公蘇潭陳公東浦熊公謙山

司寇已內遷都運及觀察會公

賓谷方公勛堂持節相後先數公並知我高義青霞竊麥舟倘
見貽歲暮當言旋受恩懷一飯酬知期百年念此增感
激淚下如流泉

舟中雜詩

臨江離袂分拂曉片颿颺稍辭塵市喧已覺水天曠秋
山能送行晴雲復多狀一覽豁旅愁中流櫂歌放

櫂歌聲嫋嫋吹我過洪都故人一載別近得藏園書笑

蓉惜開晚楊柳寒更疎咫尺不相見相思復何如

泊謝埠得

蔣冬生書

昨夜泊龍津雞鳴峭帆去精舍望迢遙晦翁讀書處天

青市湖船月黑梅巖樹載酒思昔遊欲補離騷注

東山書院

爲朱子注離騷處
予庚戌主講於此

白日照清淺微風漾漣漪爛爛圓石文裊裊蒼苔絲游
鱗靜可數沙鷗閒未知沿流采芳草含情將贈誰
舟行若凌空倏然近蘆葦飛花入船窗低枝拂船尾我
懷秋雪庵蕭瑟亦如此何日西溪陰持竿釣秋水

九鳥灘

長河走驚濤巨灘橫砥柱驟觸勢暫迴力戰氣逾怒雪
浪傾作山蛟涎吐爲霧九鳥不得飛

諺云九鳥
灘飛不得

一葦敢

輕渡連朝狎清淺俄頃變憂怖全力爭半篙微命託孤

注浮生足波瀾此水疑灩澦不知涉險難豈悔虛名誤

過貴溪望龍虎諸山

眾山圍貴溪形勢儼關隘龍虎名旣殊望氣已雄邁傳
聞張道陵朝天森羽蓋龍血淬劒鋒猛虎亦馴拜天魔
憫餘威至今受羈械月黑萬山陰不敢騁幽怪此語出
瑣談未足昭炯戒豈有學道人刻意弄狡獪我疑黃帝
初蚩尤逞蜂蠆涿鹿大出師一戰戮渠帥雲旗干丈長
斫倒卧空砦天鼓墮雷門萬劫不能壞飲泉渴驥奔觸
石怒蛟潰折戟與橫戈嵯峨尙相對清時兵氣銷
文德敷無外區區湖湘間小醜敢爲害靈異此特鍾峯

蠻極殊態定有豪傑生驟與功名會學仙愧疎頑賦性
頗孤介參龍術未工談虎色先憊酷愛山骨奇翻惜江
行快扣舷歌烏烏天風激寒瀨

弋陽溪

微雨釀初寒輕橈漾新霽漲落沙岸高風定石灘沸苔
髮淨可梳波紋蹙逾細拍拍水禽過策策游魚逝數峯
開夕陽遙天接空翠稍參雲澹濃未辨山向背臨水或
有村鷺蔬不成市炊煙裊若絲浦樹平於薺塵勞惜暫
閒清景恐難繼佳節負黃菊故園隔青桂蓼花旣疎散
楓葉況明媚試展輞川圖欲補愚溪記

老虎灘

眾水來玉山中流少隄障浩浩七百里直至鄱湖放山
靈駭且奔迸力與之抗崇嶺扼關塞奇峯列戈仗開合
勢屢變險峻不容讓激爲百里灘灘灘各殊狀貴溪最
峭急弋陽稍平曠蓄銳至河口九獅屹相向此灘以虎
名乍聞色已喪怪石森爪牙猛氣鬪龍象嗟彼水西流
我舟獨東上求進僅尺寸失勢迺尋丈篙點驟如雨濤
聲喧若盎羣力至此窮孤立欲誰傍須臾風勢同片帆
倏驚颺轟雷疑怒潮掣電過層嶂脫險累漸輕披襟氣
爲壯徑攜一葉舟欲破萬里浪賦命嗟阻艱涉世敢流

岩每當人事殫輒荷神力貺隻身涉江湖私心迫貧養
知難退未能臨深戒豈忘幸脫虎口危不然魚腹葬長
嘯激清風旅懷亦雄暢

信江書院

信江繞郭流水清沙練練隔江千萬峰倒影皆可見夕
照明翠微雲霞態逾變美人倚新妝鏡波生瀲灩山半
叢篠深黃葉滿籬院擊磬聞雅歌載酒侍芳燕余匪孟
生才濫被韓公薦干旃負佳招講席改鄉縣傳經愧何
有奉母計差便興魯古名坊南豐主文姑其中多老松
亦可眺層巘仁智樂豈殊岩壑美難擅江水既清空羣

山復婉變此間結茅茨大可飽菱芡螺髻晚黛濃蛾眉
新月艷嘉景惜小淹故人寄遐眷林卧夙所耽山靈約
終踐西風吹曉帆白鷗早迎餞

桐江

蘭谿至桐廬水清如益妍好風復相送舟行殊渺然榜
妾喜閒暇新茗能自煎鑪聲沸秋雨甌香生午煙我持
一卷書就讀西窗偏白鳥不避人青山自隨船

晴巒秀插天文漣漾成綺江抱萬山流山卧空江裏濃
翠蒸作雲山斷雲復起漠漠化林煙英英照江水身在
雲水中坐愛風日美胸次無纖塵空明亦如此

山中多白雲江上半紅樹望之如錦屏爛然照津路緬懷香蘇館主人賞秋處楓相得新霜丹黃落無數閒雲今出山空庭易成暮一徑葉聲乾寒雅自徐步

斜日照溪水搖綠上衣襟攬之不可得縹緲如花陰晏坐展幽抱重以橫素琴已入富春渚彈作流水音昔賢慎出處所計非升沈高蹈慚未能垂綸愛清深

江上吐華月鏡天清若空萬朵青蓮花舞入銀濤中布帆三百尺拂拂吹長風浩蕩出瀧口滅沒踰前峯牀頭有鐵笛其聲摩蒼穹惆悵不敢吹下迺蛟螭宮

仲冬十四日夜月明風利由七里瀧放舟直抵富

陽

紅日墮嶺歸雁沒孤帆杳杳江天長浮雲埽盡冰鏡出
萬山一氣連空蒼其時西北風正利綠蒲飽掛馳高檣
山影動搖浪花捲月與天水俱茫茫崖壁巉巖俯江岸
先生釣處空祠堂西臺晞髮客繼至竹石擊碎天爲霜
中流望之但煙樹散僊或者驂鸞鳳出瀧山少江面濶
貝宮銀闕參差光順流二百九十里達旦竟可趨錢塘
人生窮達大難料客程淹滯今初償江山自昔擅奇秀
風月至此尤飛揚錦袍縱酒采石夜羽衣吹笛黃樓涼
太白東坡竟誰是一星爲客依文昌椽燭花開照寒碧

醉中潑黑蛟龍僵持寄謝公定心許高歌請恕袁宏狂

方伯謝蘇潭先生館余八甄書舫賦呈四首

辛亥之冬我北征飲公花下白玉觥公爲長句何縱橫
峭帆一出袁公浦驛使迢迢隔江渚相思日暮花成雨
癸丑之夏我南歸淮陰握手重欷歔公子念我頻牽衣
公持繡斧官兩浙我自吳門寄詩別蓬門去掩蘇山雪
前年聞公蒞三晉太華芙蓉削千仞公詩風骨同高峻
去年公復遷武林塞裳欲涉寒江深詩夢夜夜孤山陰
思公不見今三年衝寒徑買西泠船公喜把臂呼梅顛
平生感激因知己越中況有佳山水負笈從公自今始

書蘇潭方伯浙東詩後

永嘉山水天下奇康樂守此傳新詩丹霞皓月蒼松枝
二千年後繼者誰南康方伯公裔孫按部來持白虎旂
盡撤供億屏騶從獨探幽險窮朝昏石門瞰江壓高樹
長劍嵯峨倚天柱南北雁宕兩龍湫屐齒當年未經處
四十九盤徑始通浮嵐積氣連諸峯上負蒼天下碧海
上根半插雲濤中銀河奔瀉成玉虹萬古洗出青芙蓉
蓄勢一落八千丈吹煙吹雪何濛濛我自蘭谿至桐江
扁舟夜泛七里瀧江水清空山月美已誇絕勝難爲雙
造物至此逞新意更以幽深出雄肆會稽天台來括蒼

尺波片石皆仙氣先生之才大如海先生之筆矯如龍
一篇脫手萬山拜直將句法參神功生平高詠懷謝侯
洗硯春礪紅泉流越山入夢已十秋青鞋欲往嗟阻修
八瓢書舫四照樓佳句百讀不肯休江山主客前無儔
惜哉我未從公游

秦小峴

瀛

觀察招飲卽送大都

公來只飲西湖水公去只贈西湖詩

杭人繪圖徵詩爲餞

扁舟湖

上載詩去僊官心事閒鷗知萬頃空波浸烟樹隔江送

客山無數風流絕代白香山

皇恩例許三年住風篁之嶺龍井寺中有題名舊碑記

觀察爲淮海先生補刻龍井寺題名碑記
公行苦早我來遲惆悵疎鐘出寒
翠絳蠟如山酒似川金龜換醉共青蓮旌節歸來開幕
府看花合權鏡湖船

戊午八月渡揚子江望金山焦山寄賓谷運使

長江萬里天一碧兩點金焦如潑墨扁舟我從京口來
江風不顛布帆直白鳥欲下山蒼然反照入江斷霞赤
波瀾浩浩歸混茫烟樹迢迢赴昏黑徘徊明月照海門
隱約寒星動魚脊浮屠迥出天中央妙高臺倚八千尺
載酒昔從戴侍中於此憑闌看江色謂蓮士先生自古雲濤
萬馬束至今雨雪千帆北浮生飄泊如轉蓬壯遊俯仰

但陳跡爪廬深處又鐘聲惜哉焦僊吾未識

題襟主人抱幽賞渡江屢約尋焦僊名山有願久始償
別後寄我詩六篇其時山中正人曰江南春早氣已妍
嶺梅含笑破微雪寺松交翠收寒煙殘碑舊傳鶴骨瘞
古鼎細翫龍文旋危亭佳處海氣連一盃收盡東南天
爛銀盤裏黑如豆颶風吹到新羅船我卧溪館秋病纏
思公不見心煩悵巨鯨排山鵬擊浪想擲此筆扶桑邊
蓬萊咫尺今可到欲往從之風引還奇才何限失交臂
佳境暫留關夙緣夜半潮平月正午蔚藍下照開瓊田
恨不騰身跨白鳳乘雲去拍洪崖肩明日卸帆廣陵驛

公應失喜招梅顛早晚揮手謝公事俊遊再辦雙行纏
銀槎不辭盡日醉冰鏡更比今宵圓晉卿家樂甲天下
謂王夢樓太守請攜小部雙峯巔公倚鐵簫我能和江山妙絕
同千年

秦良玉錦袍歌

五花戰馬千金戟馬上紅粧能殺賊健兒羅拜秦將軍
氣蓋西川貌傾國平臺召見詩寵行天子臨軒賜顏色
宮錦歸來換戰袍鏤金錯繡皆天澤崇禎之季軍政荒
本兵獨倚楊嗣昌盡驅流賊入巴蜀斬刈黔首如牛羊
白桿縱橫三十萬將軍盡室來酣戰旌旗五色陣雲高

帳下女兒亦驍悍烽火連天笳震地殺賊逾多氣逾厲
賊中望見將軍來百萬瑊戈同日棄雪花如席天漫漫
錦袍雖暖邊風酸寄衣一千五百襲將軍愛士同飢寒
張令軍前鼓聲死本兵不恤將軍恥士兵二萬請分廩
妾家甘爲朝廷毀巡按巡撫嗟何人劉之勃與邵捷春
按圖扼要十三處奇策不用徒因循此時錦袍慘無色
半污蠻血參征塵沙場百戰蛾眉老畫像敢望登麒麟
成都一破金甌裂石砧孤城堅似鐵巾幗蒙恩四十年
耿耿丹心照邊月左家良玉非英雄一敗終教慙晚節
思陵身殉福王走南渡衣冠復何有六宮統綺燒成灰

秦家錦袍猶世守海內承平二百年岷江劍閣無烽烟
妖婦何敢結羣盜鼎鑊未免煩烹煎攻心有術當革面
內地戡亂殊籌邊宣恩一檄定感泣各習井臼投戈鋌
請祀將軍勵忠義靈旗風送鐃歌旋錦袍樂府蠻女唱
弓衣合繡都官篇

題謝薌泉

振定

侍御玉帶橋觀月圖

危橋跨江五千尺東坡玉帶安在哉七百年前山寺月
照公今夜江船開空波萬頃化積雪冥冥海氣侵樓臺
鰲背如山映天黑破烟一點神燈來我舟前夜溯京口
蓬瀛欲到風吹迴海門回望月出處螺髻已沒蒼雲堆

揚州池館好花竹紅袖當筵歌落梅探幽便擬入圖畫
惜別肯不傾樽罍江山俯仰萬古淚美人名士俱塵埃
酒酣擲筆怒蛟舞壯遊如此輸僊才

食黃麋同賓谷都轉賦

將軍射生致佳貺使者召客開官庖黃麋作膾美無匹
縷金細切堆盤高題襟館外凍雲合積雪成海鋪銀濤
今夕何夕不痛飲孤負二分明月寒梅梢君不見羊羔
美酒黨太尉美人如花共沈醉又不見殘盃冷炙杜陵
客牛肉一飽死亦得我生幸未溝壑填老饕賦就空饒
涎文章自喜亦何用聚散無端真可憐明日雪晴鵬滿

天諸公射獵臨甘泉
山名綵旗十丈翻雲烟
勁弓怒發三
麇連熱血一斗飲馬前
壯哉且賦城南篇

喜晤胥燕亭

繩武

大令于邗上爲題杏花春雨江

南圖

江水二月綠可憐
花枝一照紅徹天
故鄉春好不歸去
紗帽醉脫沙鷗前
當年我亦俠少年
聽雨只在烏篷船
纏頭百萬擲宮錦
山香舞罷東風顛
亂鴉殘雪邗江樹
傾蓋相逢惜遲暮
賣花聲斷小樓空
詩夢如煙落何處
陽羨求田計總疎
一樽飄泊又江湖
腸斷枝頭舊春色
新詞唱殺宋尙書

揚州水亭懷古

東海鯉魚飛上天楊花江北吹成煙延賓亭館臨江起
十州已借黃龍水阜山布衣獻策來帷幄不設高堂開
斷橋明月夜深出鐵箸對畫寒鑪灰錦衣坊第歸何遲
天泉閣宴尤可悲陛下龍興老臣力此事只有金奴知
錦洞天中萬花醉齊雲船破周師至舊遊誰賦鳳凰臺
新銜自署鴛鴦寺廿四橋連十四樓蔣州煙粉又揚州
唱殺南唐新樂府一江春水向東流

瓊花觀

道土以圖屬題中有
蔣定甫先生手蹟

僊風吹墮玉一株天上樓臺黯無色觀中花開明月光

井底人歸洞雲碧御袍黃後蓬萊紫移置紛紛宮禁裏
孤根自守天所憐不與兒女爭妖妍蒼苔上砌朱闌斜
冬青樹老啼寒鴉瓊枝絕代亦塵土何況江南桃李花
藏園仙客騎鯨去恐在玉鈎最深處夢中綵筆當誰傳
我謫人間三十年

爲顏衡齋大令題聽泉圖

七十二名泉君聽在何處空響落雲間泠泠發清悟我
思飛瀑巖臨流緩詩步山風吹酒醒斜陽萬松樹

又題石門藤塢圖

石門俯幽磴老樹纏蒼藤白日照不入下有千年冰此

遊最清絕但攜苦茶僧余懷亦蕭散裹糧嗟未能

歐陽公南唐官硯用澄心堂紙韻爲鐵冶亭潛帥

作

少微製硯多良才眞賞未遘蒙蒼埃此硯幸入醉翁手
所寶惟德非瓊瑰手澤摩挲七百歲古香拂拂生麝煤
羅紋山下選工處雲根斲破青崔嵬王家舍人棄如土
江南故老心先摧龍尾銷沈石魚死三十六峯安在哉
區區片石感興廢鸛鶴淚滴松風哀往時監造給官俸
後賢寶惜逾金帛相隨廿載老居士手記一一煩心裁
平生石友最清鯁豈以玩好供嘲詼朋黨論成痛至骨

清天終埽浮雲開一角小缺亦何憾乾坤正氣留中臺
夷陵洗硯峽水碧錦雲所覆疑蓬萊平山亦公舊遊地
當時賓從皆鄒枚殘雅如墨點江樹東都觴展羣公陪
澄心堂紙尙可覓乞寫硬句盤空來

題陳東浦方伯敦拙堂詩集

西江詩派宋極盛導源五字由柴桑陳公家卽元亮里
騷壇旗鼓今堂堂公詩苦刻四十載天才學力俱相當
讀書千卷厚根柢落筆萬丈騰光芒當其構思極慘澹
發爲巨製何雷硨閉門覓句久始出不與時彥爭名場
弱冠射策領秋解才名第一誰顏顏香樹老子目如炬

同時乃得雙鳳凰

公與蔣定甫先生同爲錢太傅所知

人生知己不易邁

至今感涕猶霑裳種花早出蒞州郡報國不獨誇文章

平生大節忠孝備以詩爲政敷有方性情所結自沈摯

骨格至老逾堅蒼況得江山助神采兼以戎馬資騰驤

金川殺賊三百萬棧道杳杳無牛羊礮火轟城箭灑甲

公持繡斧催軍糧擲筆淋漓戰血紫眞見巨刃摩天揚

天中雄鎮首嵩岳天下名花開洛陽公登吹臺倚橫笛

公遊雪苑羅清觴黃河之水瀉千里直欲傾洞歸詩腸

連歲開藩鎮吳楚大江南北栽甘棠部民下榻盡名輩

鉅公持節多吾鄉金陵壯麗古無匹烏衣朱雀關興亡

秦淮烟粉埽地盡孝陵松柏參天長中山舊宅我所館
紅闌碧瓦亭中央一池寒淥浸樓閣六朝老樹纏冰霜
公來論詩每竟日我或背手行虛廊凍雲千樹如潑墨
明月三更初上墻密竹蕭蕭散空翠早梅浥浥吹暗香
園中雙鶴好標格與我相依成雁行鶴能高唳我必和
我能起舞鶴亦翔瞻園一別附仙櫂大旆十日留金閭
每爲公卿說吳質座中傾倒錢與王辛楣禮堂兩先生酒酣耳
熱論益恣上下李杜韓蘇黃公爲擊節我抵掌旁觀頗
訝狂生狂嗚呼此事貴心獲非遇知者甯終藏神勇不
在逞客氣絕艷不在誇濃粧一唱三歎清廟瑟瑟琵琶箏

笛邯鄲倡博學亦須妙鎔鑄真髓未得皆粃糠要期生
面闢千載豈以名位分低昂公詩博大兼眾妙滄溟渤
解淮河江火齊木難萃珍異卽有沙石何相妨我詩濺
濺瀉溪壑濯纓祇辦歌滄浪一泓清澈縱可喜安能自
怪涵汪洋別公三載誦公句感公知遇誓不忘舟中拊
卷叫奇絕雲山如畫馳風檣詩懷至此逞雄駿攬結元
氣包大荒夢跨鯨魚逢李白碧海萬里天茫茫

蘇潭圖爲謝方伯作

蘇步有井思南康蘇潭移宅今南昌寒碧一頃玻璃光
畫閣臨水書連床潭中尺半魚無數潭上春雲吹不去

新篁墮粉水花開我記先生讀書處先生通籍四十年
故園只此屋數椽蒼生憂樂在懷抱高卧幾日耽林泉
露冕行春徧吳越太華峯高暫持節溫公海外識清名
謝傳山中留別業蘇齋石墨共題襟從游最久知最深
但逢酒熟花明候便許寬鞋瘦策尋亭前雙鶴我舊識
使院攜歸愛高格秋風一別清唳長照影蘇潭霜月白
單谿師使院舊蓄雙鶴今歸蘇潭蘇公堤外畫船過蘇小墳前新柳多
江鄉春水生綠波歸帆未買眞蹉跎我家亦有香蘇館
門對溪流空翠滿年年聽雨在烏篷夢裏沙鷗共蕭散
淩烟畫就得閒身東第期公岸角巾平泉花木春無恙

願買青山爲結鄰

香蘇山館古體詩鈔卷三終